




Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.442






Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.442



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.442



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.442

1.6.442


FRANCISCI VERINI
SECUNDI CIVIS
FLORENTINI
LIBER.

1
6
442

In quo à calumnijs detractorum Philosophia defenditur,
& eius præstantia demonstratur.

A NICOLAO VMBROSIO PISANO
*Artium Doctore, ob Authoris peritissimi amantissimiq;
sui præceptoris absentiam in capita distributus,
& indice illorum locupletatus.*

AD SIXTVM V. PONT. OPT. MAX.



ROMAE, Apud Io. Angelum Ruffinellum. 1586.
Cum Licentia Superiorum.

137

LIBRARY OF THE

SECOND CLASS

OF THE

LIBRARY

OF THE


OF THE

OF THE



OF THE

1. 6. 442



SANCTISSIMO

SVMMOQVE PONTIFICI

SIXTO QVINTO.

FRANCISCVS VERINVS II.

Fælicitatem optat perpetuam.



Hilosophia nihil aliud profecto existit, quam sapientiæ amor: quemadmodum præclare, tum omnes præstantiores Philosophi, tum etiam ipsa natura rerum, circa quas versatur, nobis demonstrant. Sapientia verbò prima (Sanctissime ac Beatissime Pater) illud idem est, quod ipsemet Deus, qui rerum omnium, & præsertim hominum α , & ω , hoc est, principium agnoscitur, videlicet, à quo ortum ducimus, & finis in quo beatè viuimus; & beatitudo sanctitatem, & ani-

a 2 mi

29

mi puritatem requirit, vel hæc eadem præclarissima facultas hûc totis viribus, atque contemplationibus tendet; vt nos, cum ad sanctitatem, tum ad beatitudinem rectè, quantum ad intellectum dirigat, & vehementer, quantum ad affectum voluntatis, inflamet. Quo etiam Christi fideles ac tu (Sanctissime, ac Beatissime Pater) propriæ vitæ exemplo, & summa diligentia, & dirigere & inflammare contendis: quo denique velis remisque nos omnes, qui à Deo vocati sumus, tanquam ad portum tendere debemus. Verùm cum hæc omnium humanarum facultatum præstantissima (Deo ita volente) in Platone, ac Aristotele, velut in Philosophorum omnium Principibus inuenta sit; qui Gentiles extiterunt; & Doctrina diuinitus reuelata caruerunt; quæ omnem salutarem veritatem absque vlllo mendacio continet: hinc factum est, vt illi lumine tantum naturæ, & humano ingenio Philosophantes, neque vniuersam veritatem, neque penitus absque vlllo mendacio eam assecuti fuerint. Quare horum facile Principum Philosophorum primi Interpretes, ipsi videlicet Græci, & ex Arabibus Cõmentator Auerroes: tum quia etiam ipsi gentiles fuerunt: tum etiam quia hos Philosophantes, & præsertim Aristotelem, nihil sine fortiratione protulisse obseruarunt. His de causis euenit, vt Aristotelis Doctrinam vt Gentiles potius exponere, ac tueri voluerint, quàm ad pium, atque verum sensum reducere. Hos, in eadem Aristotelica Philosophia,

sophia demum exponenda, multi ex catholicis Philosophis imitati sunt: idque in ipsorummet, & plurimorum discipulorum ruinam. Verum Theologi, ac Doctores tùm humanæ, tùm diuinæ veritatis, huius Zelo, ac salutis electorum acriter stimulati, præsertim Diuus Thomas, Gaietanus, Egidius, & alij huiuscemodi humanam Philosophiam Diuinæ minimè repugnare demonstrarunt; Si ipsa rectè exponatur, aut ad pium, ac verum sensum referatur. Hæc quæ ab Excellentissimis Theologis sparsim, & in eorum libris Theologicis bene, ac pie dicta fuerunt, a me nunc in præsentī opere collecta sunt: cùm, vt ortum ipsius Philosophiæ, essentiam, partes, atque præstantiam conuenire demonstrarem Theologicæ veritati: tùm, vt Sanctitati, & Beatitudini tuæ pariter, ac vniuersæ Christianæ Ecclesiæ de pio, & vero philosophandi modo fidem facerem, quo in docendo, ac disputando in hoc Almo Pisano Studio triginta & vnum annis, & publicè & priuatim vsus sum: & denique, vt opus hoc meum tanquam veræ, ac piæ philosophiæ exemplar (te Beatissimo, ac Sanctissimo Pontifice fauente) posteritate, ac futuris philosophis relinquerem. Hoc ipsum igitur munus hilari fronte suscipe, ac splendore authoritatis tuæ, quæ summa dignoscitur, illud, vt verum, atque catholicum approbes, atque munias; modò tale uidelicet id esse (quod spero) comperias. Cæterum primus, ac solus omnium author bonorum Beatissime Pater tibi plurimum


300

rimum præsentis uitæ tribuat: ut plurimo tempore
sub tua sanctitate, ac beatitudine Catholica Ecclesia
sanctè, ac beatè uitam agat. Vale.



PERILLVSTRI VIRO
ALFONSO RICCIO
PROTONOTARIO
APOSTOLICO,

ET VTRIVSQUE SIGNATURAE
REFERENDARIO.



RECTE equidem mecum agitur,
Alfonse Ricci Cum enim nihil mi
hi magis esset in votis, quam ut sin
gularem meam erga illustres tuas
virtutes observantiam tibi pri
mum, deinde alijs omnibus, testa
tam redderem, opportuna mihi se occasio obtulit. Ne
que ulla unquam opportunior certe offerri poterat.
Philosophiae commendationem, à Francisco Verino
Sixto V. Pontifici Maximo praecipue dicatam, ti
bi quoque convenire, optimè noueram. Librum de
eius laudibus tibi do: qui, Philosophiae cultor, at
que sapientiae amator es, & eam iam, con
secutus, hominibus tuo exemplo viam pramon
stras, qua iter sibi ad laudem, & ad gloriam, pa
rent. Nec tibi maiora deberi, quam iam es ade
ptus,

49

ptus , omnes affirmant . Iidemq. iure iudicant ,
eum te fore aliquando , qui , Virtuti locum suum
tribui , reipsa comprobet ? Sixto Quinto Pontifice ,
quid non sperandum ? Tu ei merito gratissimus .
Ut bona omnia augurari facile liceat . Francisci
igitur Verini , summi Philosophi , & in Acade-
mia Pisana de superiore loco docentis , librum (ut
dixi) Philosophiæ laudes complectentem , Pontifici
summo dicatum , ad te mitto . Ut liber ipse , tuo du-
ctu , tuisque auspicijs , Pontifici gratior sit : & ego eo-
dem tempore meam erga te observantiam aliquo
modo declarās , firmiore vinculo me tibi adstrictum
reddam , dum tu , benevolentia tua me magis am-
plectēs , maiorem tui animi , quam mearum virium ,
rationem habes . Deus optimus consilia tua fortunet ,
teque nobis quam diutissime seruet .

Romæ . Die prima Nouemb. MDCCXXCV.

Tuis maximis virtutibus addictissimus

Io. Angelus Ruffinellus.

INDEX CAPITVM.

Garrus illorum reprehenduntur, qui Philosophiam sanctæ Theologiæ repugnatricem reddunt. Cap. I. pag. 1

Authoris intentio proponitur, & methodus in eius declaratione seruanda aperitur. Cap. II. 2

Diuinum imploratur auxilium, & Philosophiæ primam originem ostenditur à Deo esse. Cap. III. 3

Philosophiæ definitio, tum quoad eius veram essentiam, tum quoad nominis Ethimologiam traditur, Cap. IIII. 5

Vniuersa Philosophia in suas partes distribuitur, & singularum partium ratio redditur. Cap. V. 6

De quibus agendum supersit aperitur, & moralis Philosophiæ subsidio ad Dei pietatem cum ciuili vita coniunctam nos adspirare demonstratur. Cap. VI. 11

Oeconomicæ utilitas ostenditur, qua ad Dei cultum dirigamur. Cap. VII. 13

Ciuilis facultatis utilitas ante oculos ponitur ad Deum agnoscendum faciens. Cap. VIII. 15

Quid fructus ex legali potentia acquiratur quod ad Dei cultum perducatur & ad animos bonis moribus informandos. Cap. IX. 16

Dicendorum ordo proponitur & eius ratio redditur. Cap. X. 17

Conclusiones aliquot proponuntur ad diuina spectantes ex Physiologia depromptæ. Cap. XI. ibid.

Prima Physica conclusio diligentissime explanatur, scilicet Deum esse mobilium primum immobilem motorem. Cap. XII. 18
b Secunda

Index Capitum.

<i>Secunda Physica conclusio ad diuina pertinens , aperitur.</i> <i>Cap. XIII.</i>	19
<i>Tertia Physica conclusio de diuinis agens pulchre declaratur , & confirmatur . Cap. XIII.</i>	20
<i>Quarta Physica conclusio diuina attingens exponitur .</i> <i>Cap. XV.</i>	22
<i>Quinta naturalis conclusio diuina amplectens , & dilucidatur & roboratur . Cap. XVI.</i>	23
<i>Veritates aliquot de anima nostra in seipsa ut à Deo est ex physiolo- gia acceptæ proponuntur, quæ catholica fidei consentiunt.</i> <i>Cap. XVII.</i>	24
<i>Prima conclusio demonstratur . Cap. XVIII.</i>	25
<i>Secunda Physiologica conclusio ostenditur . Cap. XIX.</i>	26
<i>Tertia conclusio explanatur . Cap. XX.</i>	29
<i>Quarta Conclusio demonstratur . Cap. XXI.</i>	30
<i>Quinta conclusio de anima probatur . Cap. XXII.</i>	31
<i>De anima ut virtutum generibus informari potest , sermo habetur, ac numerus illorum proponitur . Cap. XXIII.</i>	34
<i>Ex naturali Physiologia ad scientiam contemplatoriam, & præci- pue ad sapientiam nos & dirigi, & inflammari .</i> <i>Cap. XXIII.</i>	ibid.
<i>Ope & subsidio mathematicarum in vniuersali, ad diuinorum co- gnitionem nos deuenire. Cap. XXV.</i>	36
<i>Arithmetica ad notitiam omnium formarum, & ad intelligen- tiam Dei maxime conferre . Cap. XXVI.</i>	39
<i>Geometriam ad animæ, Dei, & aliarum formarum cognitionem non parum conducere . Cap. XXVII.</i>	40
	Vnius

Index Capitum .

*Vnius astronomiæ subsidio nos ad intelligenda catholica plura ad-
spirare. Cap. XXVIII. 42*

*Scientiam harmonicam nos ad diuinam pietatem excitare .
Cap. XXXI X. 43*

*Ope perspectiuæ quam plurimum veritatum diuinarum nos cognitio-
nem acquirere. Cap. XXXX. 44*

*Diuinam philosophiam præceteris philosophiæ partibus , ad Deum
ipsum nos adducere atque promouere. Cap. XXXXI. 45*

*Calumniarum numerus recensetur in quibus Philosophia à theolo-
gia dissentiens predicatur ? Cap. XXXXII. 47*

*Prima calumnia ad Deum attinens proponitur , & suis rationibus
munitur ? Cap. XXXXIII. ibid.*

*Validissimis rationibus calumniæ falsitas probatur tum ex Aristo-
tele , tum ex Platone petitis . Cap. XXXXIII. 49*

*Detraكتورum & calumniantium rationes radicitus euelluntur
ac dissoluuntur . Cap. XXXV. 51*

*Secunda calumnia in medium adducitur & simul atque rationibus
fulcitur . Cap. XXXVI. 54*

*Iaciuntur fundamenta tria, quibus acriter detractorum calumniæ
explodantur , & omnia ex nihilo creata fuisse quomodo intelli-
gendum sit exponitur . Cap. XXXVII. 56*

*Rationibus validissimis confirmatur à Deo omnia fuisse ex Ni-
hilo creata . Cap. XXXVIII. 58*

*Philosophia ac Theologia in quibus differant aperitur, & quedam
problemata ad mundi creationem pertinentia dissoluuntur .
Cap. XXXIX. 63*

*Tertia calumnia proponitur suis rationibus corroborata .
Cap. XL. 65*

Ad-

Index Capitulum.

<i>Adducta calumnia exploditur & rationes illius pulcherrime diluuntur. Cap. XLI.</i>	66
<i>Calumniae pertinentes ad Angelos & demones proponuntur suis rationibus fulcitæ in quibus philosophiam Theologiæ oppugnati- cem garriunt. Cap. XLII.</i>	68
<i>Lapsus calumniarum ad Angelos pertinentium praeceptis ostenditur. Cap. XLIII.</i>	69
<i>Calumniarum ad demones attinentium ruina maxima demonstra- tur. Cap. XLIIII.</i>	71
<i>Calumnia de anima nostra proponitur, eademque rationibus & au- thoritatibus confirmatur. Cap. XLV.</i>	72
<i>Falsitas calumniae patefit, & animam nostram immortalem esse de- monstratur. Cap. XLVI.</i>	74
<i>Rationes detractorum dissoluuntur, & auctoritates illorum expla- nantur. Cap. XLVII.</i>	76
<i>Due calumniae ad animam nostram pertinentes proponuntur & suis rationibus confirmantur. Cap. XLVIII.</i>	80
<i>Philosophia ab utraque calumnia doctissime defenditur. Cap. XLIX.</i>	82
<i>Supradicta colliguntur & detractores ad Philosophiam benigne re- uocantur. Cap. L.</i>	85




FRAN

7

FRANCISCI VERINI
SECVNDI CIVIS FLOREN-
TINI LIBER,

In quo à calumnijs detractorum Philosophia de-
fenditur, & eius præstantia demonstratur.

*Garritus illorum reprehenduntur, qui Philosophiam sanctæ
Theologiæ repugnatricem reddunt. Cap. I.*



Vò ruitis vos? vos inquam præ cæteris,
qui pro dignitate Philosophiam profite-
ri vos ipsos existimatis, cùm alioquin
eius interpretes ita sitis, vt eam à quàm
plurimis Catholicis veritatibus (quæ nos
ad verum Dei cultum perducunt, & ad
æternam beatitudinem) dissentientem o-
stendatis, ac prædicetis. Nonne à Deo ita

fuisse rebus omnibus communicatum esse, & vivere, his qui-
dem clarius, ijs verò obscurius, rationi consentaneum est, vt
ipsæ primo in eius cultum nos manuducant? Deinde, vt ad
operandum secundum rectam rationem Prouidentię, & vo-
luntati Diuinæ conformem erigant? Id quod præclarè à Pla-
tone vj. ac vij. de Repub. nobis ostenditur & quemadmodū
optimè etiam à Peripateticis deducitur, vt ab Alexandro,
Simplicio, & Auerroe in præfationibus eorum in primum
de Physico Auditū. Præterea si Theologia diuinitus reuela-
ta omnium aliarum, quæ humana ratione adinuentæ sunt,
peritiarum Regina existit, ut quæ sola diuina Myſteria no-
bis aperiat, & absq; vlllo mendacio, non ne illi Philosophiam
A vestram

*Ratio pri-
ma.*

*Ratio se-
cunda.*

*Ratio ter-
tia.* vestram hanc inseruire decet? cur eam igitur illi aduersari
 tam acriter contenditis? si Aristoteli licuit gratia suæ Do-
 ctrinæ pro viribus confirmandæ aliorum Philosophorū sen-
 tentias ad rectum sensum deducere, & quod ei negotium fa-
 cessebat ex hominū mentibus amouere, quanto magis Ca-
 tholicis Philosophis conuenit, Doctrinam Aristotelis, quan-
 tum fieri potest, Christianę Theologię conformem ostende-
 re? illa enim si vere, & pie exponatur, ac edoceatur, falsita-
 te videlicet, ac impietate simul explosa, id ipsum ob oculos
*Ratio
quarta.* palam constituet. Namque cum, Aristotele vestro teste, re-
 ctum sit iudex sui; & obliqui, obliquum vero neque sui, ne-
 que recti: cumq; Doctrina Catholica penitus recta sit, hu-
 mana vero Philosophia comparatione illius obliqua, & im-
 perfecta, dubio procul Aristotelica contemplatio, tamquam
*Ratio
quinta.* ad Iudicem, ad vnā Theologiam referri debet. Præterea
 si media, quæ finis alicuius gratia sunt, eo præstantiora exi-
 stunt, quo magis ad acquisitionem illius finis cōferre viden-
 tur, non ne vestra hæc Philosophia tunc longe præstantior
 erit, cum ipsi Theologiæ diuinæ melius inseruiet, illiq; ma-
 gis conformabitur? Audite igitur, audite, qua ratione vere,
 ac pie potius quàm eleganter, aut acutè, ipsam Philosophiā
 intelligere opus sit, atque alijs exponere: quemadmodum
 etiam ego tum publice, tum priuatim in hoc Pisano studio
 xxxj. annis eam intellexi, atque alijs interpretatus sum; nec
 non ab omni argumentatione cōtrariæ deceptionis semper
 defendidi.

*Authoris intentio proponitur, & methodus in eius declaratio-
 ne seruanda aperitur. Cap. 11.*

Vos itaque viri admirabiles dum vestram hanc Philo-
 sophiam magnificere creditis, & vsque ad sydera ex-
 tollere, eam paruifacitis, & inferiorem qualibet arte effectri-
 ce, quæ apud nos est, redditis, idq; nimirum vestris acutis,
 atque

atque ornatis potius quàm veris, & rectis interpretationibus, adeo vestra hac proteruia eam infinitis pene calumnijs obnoxiam efficitis, à quibus ego ipsam tueri cupio. Verum quia calumniæ, si detegantur, & expurgantur, vtilitatem, ac beneficentiam Philosophiæ saltem ex accidenti præstant, multiplex autem vtilitas, ac beneficentia ex multis eius partibus rite propositis depēdet; propterea quo melius eius partes nobis innotescant, ac per cōsequens eiusdem essentia totius, ac ita demum illa calumniarum pestis abdicetur, ac mittatur in exitium, à primis, vnde Philosophia ducit originem, causis auspicabor, ordine videlicet compositiuo progrediens. Secundo definietur quid ipsa existat. Tertio in omnes eius principes partes diuidetur. Quarto bona, quæ ipsa nobis præstat, & præsertim vt cum iuxta Catholicam fidem, tum etiam secundum virtutes morales, & ciuiles viuamus, iudicabuntur. Postremo à quampluribus, & grauib; calumnijs eam (nulli labori parcens) vindicabimus.

*Ordo dī
cendorū*

Diuinum imploratur auxilium, & Philosophiæ primam originem ostenditur à Deo esse. Cap. III.

Aggrediamur itaq; negocium, initio hinc desumpto. Qui primò cætera mouet, ita mouet, vt alijs non egeat, alia vero non sine illo, me in viam veritatis ita dirigat, vt ne in aliam quidem ob ignorantiam depellar, vt cunctis ipsam Philosophiam secundum Naturæ leges, & catholicam veritatem in verum Dei cultum & veram animi pulchritudinē tendere, luce clarius demonstretur, ad eius gloriam, & nostri salutem sempiternam.

Philosophiam itaq; Plato, atq; Aristoteles à Deo ipso ortū ducere confitentur; quæ sententia, tum autoritate horū Principum Philosophorum, tum etiam ratione ostenditur, *Platonis* autoritate quidem Platonis in Timeo, vbi de vsu oculorū, & de fine cuius gratia ipsi nobis à Deo tributū sunt, verba faciens, dicit Philosophiam esse donum, quo nullum maius

*authori-
tas pri-
ma.*

A 2 vnquam

*Authori-
tas Ari-
stotelis se-
cunda.*

*Ratio pri-
ma du-
cta cum
ab Ari-
stotelis
tum Pla-
tonis
funda-
mentis.*

*Ratio se-
cunda.*

vnquam generi Mortalium à Dijs datum est, neq; dabitur. auctoritate vero Aristotelis secundo de Anima, ac tertio, vbi vult, scientiam nostram à rebus, ipsarum simulachra in nostris sensibus imprimentibus, ortum ducere. At res à Deo esse, & viuere habent, aut clarius, aut obscurius, primo Cæli 100. Quare, si scientia nostra secundum Aristotelem à rebus exoritur, & hæ dependent à Deo, etiam ipsa primo ab ipso Deo ducit originem. Quod ad rationem attinet, similiter, tum ex Platonis, tum ex Aristotelis sententia demonstratur, Philosophiam à Deo originem ducere, quemadmodum, & cætera bona. Quod ratiocinium formari hūc in modum potest; aut Philosophia, & omnino rerum scientia congenita est Animabus nostris, aut studio acquiritur. Si primo modo (vt videtur existimare ipse Plato tum in Theateto, vel de scientia, tum in Mennone, vel de virtute, & animæ nostræ secundum istum præclarum Philosophum à Deo creatæ sunt, ergo simul cum scientia. Si uero secundo modo (ut nos docet Aristoteles) Deus etiam, qui res produxit, illis tribuit uirtutem formandi sensus proprijs illarum simulachris, nostræ scientiæ erit author. Rursus, quod Philosophia, ac omnis rerum cognitio à Deo nobis tributa sit, tum secundum ueritatem, tum secundū omnes sapientes, hac alia ratione ostenditur. Quia cum Dei opera primo propter ipsum ab eo processerint ad eius gloriam; gloriam uero ipsi exhibere, ac summam reuerentiam, qua ratione poterimus, nisi admirabiles eius creaturas cognoscamus, aut ab illis per illarum simulachra edocti, aut quia huiuscemodi scientia simul cum anima congenita fuerit, & ope rerum sensibilibum in illius reminiscenciam deuenire possemus? Quamobrem, cum hæc præclarissima facultas à Deo ueluti primo principio effectiuo in nobis producta sit, & gratia ipsius, in eius scilicet cultum, & gloriam, merito, tum eius admirabiles utilitates exponere oportet, tum calumnias recensere, atq; ab eisdem Philosophiam pro uiribus defendere.

Philo-

*Philosophiæ definitio, tum quoad eius veram essentiam, tum quoad
nominis Ethimologiam traditur. Cap. IIII.*

Q Vantum uero spectat ad definitionem ab Ethimologia acceptā, Philosophia nihil aliud est, quàm sapientiæ amor, & merito. Nam cum Deus sua sapientia omnia creauerit, ac aliqua bonitate insigniuerit, & hæc omnia aliquo modo nostri gratia existant, cui dubium est, quod Philosophia, per quam res omnes nobis innotescunt, ardentissimo Dei amore nos inflammet, qui ipsamet sapientia, ac bonitas existit. Quantum uero ad definitionem huius eiusdem facultatis, quæ subiectum, & finem ostendit, hæc nihil aliud est, quàm cognitio rerum diuinarum, ac humanarum, ut Deo assimilemur, quatenus id nostra permittit infirmitas ad Dei gloriam celebrandā, idq; non solum mente, uoluntate, & uoce, uerumetiam operibus, Id quod non alia ratione fieri potest, quàm, ut eidem pro captu nostro similes efficiamur, nempe cuncta eius opera cognoscendo, ut ipse cognoscit, & humana rectè instituendo, quemadmodum omnia, quæ in uniuerso continentur à Rege Regum rectissimè gubernantur. Cum itaq; ope Philosophiæ homines præclarissimum finem consequantur, qualis est Dei similitudo, ut possibile est nobis, qui finis optimus omnium aliarum artium, ac scientiarum existit: merito etiam ab Aristotele Philosophia dicitur Ars artium, & scientia scientiarum. Cum etenim ad ipsum Deum summum omnium bonorum, ac sempiternum minimè accedere ualeamus, nisi quantum ad affectum, ab ijs caducis remoueamur, idcirco eadem Philosophia quandoq; etiam à Platone definitur, quod sit Mortis meditatio, & interdum deductio animæ ab ijs inferioribus ad supremum, ac diuinum bonum. Videte igitur, uidete uiri admirabiles, quanta sit non solum præstantia, uerum etiam pietas Philosophiæ, quæ Deum, ut sui primum principium constituit, & ad eundem, uelut ad ultimum

*Ratio de
finitio-
nis ab e-
thimolo-
gia.*

*Rationes
aliarum
definitio-
nis tum
à Plato-
ne tum ab
Aristote-
le dicta-
rum.*

*Corrola-
rium pri-
mum.*

*Corrola-
rium se-
cundum
pulcher-
rimū de
modis ef-
fendi ip-
sius phi-
losophiæ.*

num philosophantium finem properat . Hæc de ortu , ac definitione philosophiæ dicta sint . Ex ortu namq; didicimus , ipsum Deum , ut pote principium agnoscere , quamuis imperfectè , si cum intelligentia Christianæ Religionis collatio fiat . Ex definitione uero eundē , ut finem percipimus , quemadmodū ipsemet Deus in diuinis reuelationibus Diui Ioannis dixit . Ego sum α & ω , principium , & finis . Itaque cum ex ortu , tum ex definitione simul , percipere potuimus , hanc præclarissimam facultatem , triplicem , aut potius quadruplicem modum essendi habere . Primum , atque inexplicabilem in Deo , secundum in cæteris diuinis mentibus proportionem quadam . Tertiū in rebus sensibilibus , ut simulachris illorum nostros sensus informantibus . Quartum denique in ipsa anima Philosophorum , quoad esse internum , atque cæteris occultum . Quantum autem ad esse externum , id ob manifestationem in uocibus , & in scriptis attenditur . Quæ uero ratione Philosophia in uocibus , & scriptis existeret , nisi prius in animis Philosophorum esset , & in his quomodo reperiretur , nisi merito rerum sensibilibus ? & hæc quo pacto id præstare utique possent , nisi à Deo rerum ac bonorum omnium causa , illis uirtus formandi animos nostros , data fuisset . Illi itaque in numerum recte , ac fœliciter philosophantium solum conscribendi sunt , qui huiusmodi ueritates , & intelligentia , & operibus amplectuntur , atque imitantur , & inde cæteros ea , quæ ab his utique dependent , edocent , qui-que Doctrinam diuinitus reuelatā , tamquam Philosophia superiorem , ac subalternantem agnoscunt , & hanc eandem (ut scolastice loquar) ei subalternatam , & credunt , & cæteris exponunt .

Vniuersa Philosophia in suas partes distribuitur , & singularum partium ratio redditur . Cap. V.

Quantum ad tertium caput ; Philosophia diuiditur primo in duas principes partes , in speculatiuam uidelicet , &

cet, & actiuam: Namq; si res ipsi subiectas spectemus, quia tum circa res diuinas & speculabiles uersatur, tum circa res humanas & in actione consistentes, eam dubio procul in speculatiuam, & actiuam partiemur. Similiter, si eam consideremus quo ad eius duplicem finem, seu actum, quo Deo assimilari ualemus, qui contemplatio simul, ac recta ratio, seu administratio existit, nimirum hoc eodem pacto diuisionem sortietur: quemadmodum etiam, si eas animæ partes contemplati fuerimus, quarum Philosophia perfectio dignoscitur, quemadmodum corporis Medicina.

Harum porro pars una diiudicatur apta obedire rationibus re uidelicet, ac assuetudine; illiq; ope eius partis philosophiæ, quæ actiua est: alia pars animæ intellectiua est, quæ scilicet ea, quæ diuina sunt, per participationem cognoscere, ac contemplari expetit, ut tandem ad Deum ascendat, & in eo spe saltem, & præparatione (diuina simul fauente gratia, ac ueritate diuinitus reuelata) foelicitatem consequatur. subdiuiditur deinceps unaquaq; ex his Philosophiæ partibus in tres: ut autem ab inferiori exordiar, ab ea initium summam, quæ prima ordine naturæ censetur. Itaq; primum occurrit appetitus sensitiuus, deinde ea pars, quæ suaptenatura rationalis dicitur. Quæ actiua dicitur, in moralem æconomicam, & ciuilem, seu politicam diuiditur, cuius ratio est, quia aut quo ad uirtutes actiuas, & ad actiones homines per se rectè instituitur, & hoc fit à morali; de qua ordine resolutiuo, idq; breuiter quidem, sed exquisitè (pro ut subiecta materia tollerare uidetur.) Scripsit Aristoteles in decem libris de Moribus ad Nicomachum filium, cuius Interpretes præcipui sunt, Eustratius, & nonnulli alij Græci, quibus accessit, inter latinos, Donatus Acciaiolus Ciuis Florentinus. Ceterum ab actiua philosophia plures etiam rectè instituuntur. hæc autem plurium multitudo si pauca sit, quemadmodum familia, ab æconomica (de qua similiter Aristoteles uerba fecit, atq; etiam ipsi Zenophon in libris æconomicorum, rectè

*Vnde
Philosophia in
actiuam
& specu-
latiuam
diuiditur.*

*Distribu-
tio Philo-
sophiæ ac-
tina.*

*Ratio di-
stributio-
nis.*

rectè gubernatur . Si uero multitudo magna ex pluribus constans familijs extiterit , quæ ciuitas appellatur, de eius modis gubernationum abundè dictum est, tum à Platone in libris de Repub. tum etiam ab ipſo Aristotele in octo libris Politicorum , quos D. Thomas doctissimè , atq; clarissimè interpretatus est . Hac tempeſtate nostra non modo doctè, sed etiam admirabili verborum elegantia Petrus noster Victorius, & rem ipsam aggressus est, & absoluisse creditur? qui tum ob summam sanguinis nobilitatem , & vtriusq; lingue tam latinæ, quam græcæ eruditionem, præterea morū probitate, tamquam alter Sol toto Terrarum orbe refulget? Sed dicet aliquis , Hæc Philosophiæ actiuæ subdiuisio diminuta esse videtur, tū quia præter homines, qui per se viuūt, & præter familias, & Ciues, dantur etiā Vici, qui ex pluribus familijs cōstant, quemadmodum Ciuitas ex pluribus vicis, Ergo altera pars Philosophiæ actiuæ erit de recta vici institutione. Præterea quot sunt partes Prudentiæ , quæ habitus cum recta ratione actiuus existit , totidem esse similiter partes Philosophiæ actiuæ, rationi consentaneum est, At quatuor sunt partes Prudentiæ, sicut Aristoteles sexto de Moribus ostendit , & hoc ipsum experientia comprobatur , nempe moralis, Oeconomica , ciuilis , & legalis , quæ suprà videtur à nobis ommissa per incuriam . Prima obiectio ita diluenda est (vt arbitror) Si dicatur vicum vnum, aut plures, non tamen in sufficienti multitudine , aut familiam esse abundantem ex pluribus, hoc pacto distinguendum est , Si ab vno principio illarum familiarum regatur illa multitudo magna familie, tum Ciuitatem inchoatam, & imperfectam dicemus; Si plures sint vici, & distincti; tum ea vnius vici gubernatio Oeconomica dici potest; plurium vero, ciuilis aliquo modo. & ita non opus est ob uicum , seu uicos nouam partem philosophiæ actiuæ constituere . Ad argumentum de legali Prudentia, ac doctrina, dicendum est; aut hanc esse quartam partem ciuilis facultatis per accidens , quatenus accidit plurimos non

*Contra
distribu-
tionē phi-
losophiæ
actiuæ.
Obiectio
prima.*

*Obiectio
secunda.*

*Prima
obiectio
diluatur.*

*Secunda
obiectio
soluitur.*

non conuinci ratione ad bene agendum, sed ui à legalibus adduci, & sunt illi qui nimis perturbationes sequuntur. Aut dicatur, leges reduci ad ciuilem, vt ad ciues pertinent; si ad familiam, ad œconomicam; si ad vnum hominē, ad moralem. Speculatiua porro Philosophia similiter in tres partes subdiuiditur, quemadmodum præclare ostenditur ab Aristotele 6. Metaphysices cap. 1. nam, aut ens, quod speculari quidem possumus, non autem efficere, pēnitus à materia immune est, vt Deus, ac ipsæ diuinæ Mentēs: nam circa huiusmodi subiectum Metaphysica suis contemplationibus versatur; Aut ea contemplatur, quæ pēnitus cum materia, & motu sunt, cuiusmodi videntur res omnes sensibiles & naturales, sicuti corpora cælestia, quatuor elementa, & mixta ex ijs, siue inanimata sint, vt lapides, & metalla, siue anima prædita comperiantur, vt animalia, & plantæ, quæ omnia cum materia sensibili non solum existunt, verum etiā cum eadem concipiuntur, & explicantur. Has omnes Philosophia ipsa naturalis contemplatur. Denique eorum, quæ sub speculationem cadunt, quædam in materia sensibili subsistunt, sine materia vero tantisper amota videlicet quatenus ea, & concipi, & alijs exponi possunt, cuiusmodi cernuntur quantitates, quæ subiectum Mathematices existunt. Hæc eadē speculatiuæ Philosophiæ subdiuisio, ratione sumpta à fine, cui ipsa deseruit, cōfirmari potest, hoc pacto. Aut enim Philosophia rerum contemplatrix potius in mente, & sensibus externis reperitur, & ijs duabus partibus animæ potius circa rerum speculationem occupatur, & hæc est Philosophia naturalis; Aut in mente, & sensu interno præsertim in phantasia, ut Mathematica; Aut potius in ipsa mente intelligente, & ratiocinante, ut Metaphysica. Cum enim diuina qualitatibus sensibilibus careant, ob id uno duntaxat intellectu potius quàm simul cum sensu spectari debent. Quantitates uero Mathematicæ, cum sensibilia communia sint plurium sensuum exteriorum illarū simulachra ad sensum

Speculatiua philosophia diuisio.

Distributionis ratio prima.

Ratio secunda.

B suum

*Mathe-
matica
partitio.*

*Ratio
partitio-
nis.*

suum exteriorum illarum simulachra ad sensum comu-
nem, & ad phantasiam, ut in singulari considerantur, ut ue-
ro uniuersaliter, ad intellectum pertinent. Ideo iure dicitur
Mathematicam ad intellectū & sensum internū simul spe-
ctare, & res naturales ad sensum potius externū, & intelle-
ctum simul; propterea quod ipsæ accidentibus sensibilibus
proprijs insignitæ deprehendantur, vel quo ad accidentia
huiusmodi, sed in uniuersali per illorum proprias causas
à naturali spectantur magis. Mathematica rursus diuiditur.
nam aut quantitatem per se speculatur, aut applicando rei
sensibili, & naturali. Si quantitates per se; aut continuas, ut
lineas, & superficies, sicuti Geometria & corpora Stre-
metria; aut discretas, scilicet numeros; ut Arithmetica Philo-
sophorum, quæ numeros, & proportionales illorum conside-
rat. Non enim ad Philosophos pertinet Arithmetica uulga-
ris, quam uulgares, & Mercatores addiscunt, ut sciant nu-
meros colligere, partiri; quemadmodum subtrahere & mul-
tiplicare. Huiusmodi Mathematicæ illæ sunt, quæ puræ
Mathematicæ, & simpliciter Mathematicæ dicuntur, & quæ
in primo gradu certitudinis habentur. Aut Mathematica de
quantitatibus loquitur, ut sunt in re aliqua sensibili, ac na-
turali: & propterea ab Aristotele scientiæ huiusmodi inter
Mathematicas magis naturales reponuntur, secundo Physi-
corum contextu 20. ubi hæ tres recensentur, Perspectiua,
Armonica, & Astrologia, quarum sufficientia hac euiden-
ti ratione demonstrari potest: quia aut Mathematica circa
quantitatem continuā, ut in materia sensibili existentē uer-
satur, aut circa discretam; Si circa continuam; aut in re na-
turali superiori, & cœlesti, ut Astronomia; aut in inferiori,
ut perspectiua, circa lineam, & pyramidem uisus se exercet;
ut omnium eorū, quæ uisui apparent, rationē reddere pos-
sit. Si circa quantitatem discretam applicatam uocibus, &
sonis, secundum numerorū proportionales; hæc est ipsa Har-
monica, idest Musica. intelligendo similiter de ea, quæ Phi-
loso-

lōsophorum est, atq; scientifica; non autem de Musica uulgarium, quæ consonantiam uocum, ac sonorum considerat, potius practicè, quàm contemplatoriè, & potius Empiricè quam scientificè. Quod si quæraturs quare est, quod etiam harmonica subdiuidi tum minimè possit, in eam, quæ cælestibus corporibus applicetur, seu sonis illorū; & inferiorem sonorum, & uocum nostrarū. dicendum est, id fieri similiter non posse, ut de Mathematicis considerantibus quantitates cōtinuas in re sensibili; propterea quod cælestia sonos, & uoces ædere minimè possunt (quicquid dicāt Pythagorici) tum quia inter illa non intercipitur aer, qui percussus speciem soni formet, aut sono ipso, & uoce: tum quia essent ita maximi soni, qui sensus nostros corrumperēt; quemadmodum ab Aristotele in secundo de cælo aduersus ipsos Pythagoricos demonstratur.

Dubitatio.

Solutio dubitationis.

De quibus agendum supersit aperitur, & moralis Philosophia subsidio ad Dei pietatem cum ciuili uita coniunctam nos adspirare demonstratur. Cap. VI.

HUc usq; causa, unde primo orta est Philosophia, explicata est; deinde quid ipsa sit; & tertio in quot, & quas partes diuidatur, exposuimus. Consequens modo est, ut ad eius præcipuas cuiuscunq; partis philosophiæ utilitates exponendas accedamus: quæ ad Dei gloriam, ac eius cultum spectare uidetur, & ad ciuilem vitam simul cum diuina pietate coniunctam; cum horum finium gratia hîc procreati sumus, ut, quantum ad Deum attinet, piè uiuamus, quantum vero ad nosmetipsos, & ut cum alijs, secundum morales, ac ciuiles virtutes vitam transigamus. Moralis itaq; Philosophia; ut ab hac, quemadmodū ordo requirere videtur, exordiamur, felicitatem actiuam, atq; contemplatiuam nobis declarat; ut videre est apud Aristotelem, tum in primo, tum in decimo de moribus. Et de actiua dicitur, rationi consentanea

Moralis philosophia actiuā et contemplatiuā felicitatē nobis declarat

B 2 neum

Quod a-
ctiua feli-
citas à
deo pro-
ueniat.
Ratio pri-
ma.
neum esse à Deo tribui, & eo magis quo cæteris humanis bonis, ipsa bonum est præstabilius: ex quibus sanè verbis duæ rationes nobis indicantur, quarum vna est hæc. Præstantissimum bonum à præstantissima causa procedit; sed fœlicitas actiua bonorum humanorū præstantissimum est, cum cætera huius gratia expetantur, & illi subijciantur: ergo actiua fœlicitas à præstātissima causa, quæ est ipsemet Deus procedit. Alia ratio hunc in modum formari potest. Si à

Ratio se-
cunda.
Deo minora bona nobis dantur, vt alimenta, materia vestimentorum, medicamenta vtilia ad sanitatem, mediantibus agentibus naturalibus, quanto magis bonum præstantius quale est ipsa humana fœlicitas? Hæc eadem argumenta de contemplatiua beatitudine idem confirmare videntur. Quo ad media quibus vtrunq; ex his præclarissimis bonis assequi possumus; vnum est ipsa veritas, vt vim electiuā nostram rectè dirigere valeat. Alterum est habitus virtutis, quo acquisito non solum sine difficultate, ea, quæ moralis

Eadē ra-
tionēs p-
stant feli-
citatē cō-
templati-
uā a Deo
peruenire.
Quod
media
quib⁹ v-
trāq; feli-
citas ac-
quiruntur
sunt veri-
tas et ha-
bitus vir-
tutis.
philosophiæ sunt, rectè operamur, verum etiam admirabili voluptate, atq; honestate ad ea, quæ contemplatiua largitur, vsq; ad primam veritatem, miro ordine, atq; inexplicabili tum gaudio, tum facilitate conscendimus. De veritate si ad Platonem recurramus, sententia illius huiusmodi est

Platonis
authori-
tates.
Quinto de legibus.
Veritas profecto tum Dijs tum hominibus Dux omnium est bonorum, cuius, qui fœlix, beatusq; futurus est, statim ab initio particeps esse debet: vt in veritate plurimum temporis agat. De virtute vero, quæ animi pulchritudo est, à Deo solo in persona Socratis petitur in fine illius Dialogi, qui Phædrus. aut de pulchro inscribitur.

Oratio Socratis eo in loco est hæc. O amice Pan & alij omnes qui locum hūc colitis Dij, date mihi, vt pulcher intus efficiar, & quæcunq; extrinsecus habeo, intrinsecis sint amica. Diuitem autem sapientem solum existimem. Tantum vero mihi sit auri, quātum nec ferre, nec ducere queat alius,

nisi

nisi vir temperans. Si Aristotelis verba, tum de veritate, tum de virtute perpendamus, atq; exquisitè consideremus, rectè, ac piè de eisdem dicta, quemadmodum, & Plato eius Præceptor, reperiemus. Aristoteles etenim primo de moribus capite sexto in principio, se excusans, si sententiam Platonis amici sui de bono vniuersali, & exemplari ex animis philosophantium tollere aggrediatur, inquit sanctum esse in honore, veritatem amicis præferre: vbi vtens illa dictione, Sanctum, nobis innuit, propterea veritas omnibus præponenda; quia ad sanctitatem; & animi munditiam à uitijs, & ab ignoràtia; & ad eiusdem ueram pulchritudinem nos dirigit, ut ipsi Deo placeamus. in quibus duobus, scilicet in animi munditia à uitijs, & uera eiusdem pulchritudine, sanctitas ipsa consistere uidetur. De uirtute uero idem philosophus, ea nos Dei gratiam consequi, asserit decimo de Moribus, quia merito uirtutis animo, per quem Deo cognati sumus, pulchri euadimus. Hæc autem, ut diuinæ pulchritudini similis existens Deo grata euadit, unde Epictetus Stoicus in quo uirtutes in summo reperiabantur, de se ipso dicere solebat.

Seruus Epictetus eram, qui corpore mancus,

Pauperie pressus carus eram superis.

Nō minus itaq; piè, quàm uerè de uita perfecta tum actiua, tum contemplatiua, ac de medijs potissimis illarum in morali Philosophia statuitur à Philosophantium Principibus, ita, ut horum Doctrina tum ad bonos mores, tum etiam ad ipsam diuinam pietatem maximè conferat.

Oeconomica utilitas ostenditur, qua ad Dei cultum dirigamur. Cap. VII.

Quantum deinceps ad Oeconomicam attinet, Aristoteles de causis, unde ortum duxerit uiri, ac uxoris coniunctio, uerba faciēs, dicit, imprimis duplicis finis causa origi-

*Aristote-
lis autho-
ritas.*

*Duplex
finis ob
quæ ma-
ris, ac fœ-
mine co-
iunctio
facta fuit*

originem habere Maris, & fœminæ coniunctionem; videlicet, ut per per generationem filiorum in illis sint, ut euenit de cæteris animalibus, ubi distinctio maris, & fœminæ ad-est; alter vero, ut bene sint sibi ipsis mutuo adiuuando. Deinde quantum ad causam vnde motus, Dei prouidentiam existere dicit. Verba Philosophi sunt. Sic ab ipso Deo utri-

*Coniun-
ctionem
maris et
fœminæ
à Deo fa-
cta esse.*

usque & maris, & fœminæ natura ad societatem prouisa, atque instituta est: hæc enim ipsa in eo distincta sunt, quod non omnia ad easdem res vtilem habent vim, sed nonnulla ad contrarias quidem, attamen quæ eundem finem spectent eodemq; contendant; nam eorum alterum imbecillius efficit; ut illud esset magis ad cauendum idoneum ob timiditatem; hoc ad propulsandum, atque vlciscendum ob fortitudinem, & hoc quidē ea foris suppeditare, quæ necessaria sunt, illud autem intus eadem conseruare, & quæ sequuntur. Ecce igitur, quod Philosophi à Deo confitentur uiri, & uxoris coniunctionem, quemadmodum etiam in diuinis literis,

*Filios pa-
trem &
matrem
honora-
re debe-
re.*

ac catholicis didicimus. Plato in 10. libro de legibus statuit patrem, & matrem, & auos à filiis honorandos esse, neque iniuria ullo modo afficiendos? propterea quod Deus preces parentum, ut iustus exaudiat, cum parentes mala filiis precantur, aut bona. Lex itaque Dei iubet patrem & matrem

Obiectio

à filiis honorari. Quod si quis obijciat, dicens, officium filiorum, esse patres honorare, ac eisdem obedire, & opem ferre, quotiescunque rite, ac prout veros decet parentes, viuunt. huic obiectioni tum Epictetus, tum Simplicius ita respondent. Quod si pater agat perperam, patris tamen habitum non dissoluit eius actio praua; Nam illud naturale est, non uoluntarium. Itaque licet malus fuerit pater, ei paterna tamen officia præstanda sunt. Oportet ergo penitus eius curam habere? tum quia causa post Deum extitit, ut simus; tum quoniam eius diligentia, & charitate educati sumus, & in hunc usque diem viximus. Ad hæc sicut à parentibus curam, & obsequium ueluti mutuo accepimus reddere cum fauore

fauore ipsis grate decet, eorumq; iussis prompte obsequi tenemur omnibus, quæcunque ad animi vitium nos non impellunt.

Ciuilis facultatis vtilitas ante oculos ponitur ad Deum agnoscendum faciens. Cap, VIII.

Tertio loco de ciuilibus facultatibus, ut bene, pieq; ab omnibus uiuatur, si Platonis libros de Repub. legamus, sciemus omnem facultatem, ac potestatem à Deo esse. *Potestatem omnem à Deo esse.* In tertio etenim libro uersus finem. Hæc ipsius uerba sunt. Estis utique omnes in Ciuitate tamquam fratres (sic enim dicemus apud eos fabulantes, sed cum Deus formaret: quicunque uestrum ad imperandum idonei nati sunt, aurum in eorum generatione ipsis admiscuit: propter quod honorabilissimi sunt; Illis autem qui ad auxiliandum, argentum indidit; Ferrum denique, atq; æs agricolis, atq; alijs opificibus. Aristoteles etiam in libris Politicorum asserit, alios nasci Natura Dominos, alios Natura seruos: At Cœlum, & Natura à Deo dependent xij. Diuinorū. ergo ex horum maximorum Philosophorum sententia, quemadmodum etiam in diuinis literis dicitur, Omnis Potestas à Deo est, & qui potestati resistit, Deo resistit. *Locus Aristotelis.* Quamobrem præclarissimos viros Principes & qui Rempublicam rectè, feliciterq; administrare debent, in primis decet, diuino cultui deditos esse, & in ipso erudiri. quod Plato quidem exemplo Regum Persarum in Alcibiade primo, vel de Natura humana, utiq; confirmat, necnon exemplis, tum Ægyptiorum, tum plurimarum græcarum Ciuitatum in Dialogo illo, qui ciuilibus, vel de Regno inscribitur; ubi Reges Sacerdotes esse dicit. Aristoteles vero his rationibus Principi, & Regi persuadet, ut Deum colat; tum quia hoc pacto minus formidabunt Populi, ne quid contra Iustitiam fiat, si ipsum Religioni deditum existimabunt, ac Deorum timorem habere; tum quia minus contra illum audebunt insurgere, quasi Deos habeant propitios, *Locus Theologia. Principes viros diuino cultui deditos esse debere. Locus Platonis Rationes Aristotelis.*

tios, & fauentes. Numma Pompilius secundus Romanorum Rex ab omnibus unanimiter electus fuit, ob summam eius Iustitiam, & Religionem, quibus uirtutibus xliij. annis Regnum illud rectè, pieq; seruauit. Quod si gentiles religione Regna custodiri arbitrati sunt, quanto magis apud Catholicos, & in uera religione instructos id uerum erit? Nisi etenim Dominus custodierit Ciuitatem, frustra uigilat qui custodit eam.

Quid fructus ex legali potentia acquiratur quod ad Dei cultum perducatur & ad animos bonis moribus informandos. Cap. IX.

DEmum quantum ad legalem potentiam attinet; cum lex præceptio ex unaquaq; uirtute elicitæ, ex Aristotelis sententia Quinto de Moribus, existat; & uerus legislator ad uirtutem respicere debeat, teste Platone 12. de legibus; ut uidelicet Ciues bonos & uirtute præditos reddat, utq; prudentes, iustos, fortes, & temperatos. & uirtus præcipue diuina sorte, id est diuina gratia acquiratur? cui dubium quin lex diuina sit, atque admiranda secundum horum Principum Philosophorum sententiâ. Et propterea non temere lex nomen menti proximum possidet. *vos* enim mentem *ueros* uero legem, quemadmodum præclare ab eodem Platone in eodem libro dictum est. Ex quo præclaro nomine, quod menti conforme cernitur, idem Philosophus Iudici persuadet, ut leges mente complectatur, & eas in ea conseruet; si de iusto, & iniusto recte iudicaturus est. De custode legum idem Plato in eodem libro inquit, quod ipse diuinus sit, diuinisq; studiis operam dederit. In Theæteto, de iustitia hæc dicit. Deus numquam, & nullo modo iniustus est sed quàm iustissimus, totam uidelicet Iustitiæ complexus potestatem, nihilq; illi similis quàm iustissimus homo. Ex his itaque patere arbitrator, omnes philosophiæ actiue partes, non tantum ad animos

mos hominum bonis moribus informandos conducere, verumetiam diuinam pietatem ostendere.

Dicendorum ordo proponitur, & eius ratio redditur.

Cap. X.

Consequens modo est, vt ad philosophiæ contemplatiuæ partes accedamus; ac easdem non solum ad Deum nos cognoscendum manuducere, ac eius diuina opera; verumetiam ad omnes virtutes, vsque ad diuinum cultum promouere; atque ardentem inflammare vt omni ex parte Philosophum Catholicæ fidei, non solum non repugnare; sed potius inferuire prorsus appareat.

Exordiamur itaque ab ea, quæ naturalis dicitur: propterea quòd res illi subiectæ, substantiæ naturales qualitatibus sensibilibus, ac visibilibus præditæ existant: ex ijs ad diuinas, ac inuisibiles, & omnino ad ipsum Deum intelligendum philosophantes ascendere possunt, quemadmodum testatur, non solum Paulus Apostolus in Epistola ad Romanos capite primo; verumetiam nos edocet Plato exemplo hominis in spelunca positi, & ligati; sic, vt potius rerum vmbra, quàm res ipsas intueatur. Et quemadmodum etiam à Peripateticis conceditur; cum ipsorum sapientiam ab ordine addiscendi post cognitionem naturalium Metaphysicem nominent. Hoc idem ex nonnullis veritatibus; primo ad Deum & substantias separatas pertinentibus à me confirmatur; secundo aliquibus alijs ad animam nostram spectantibus.

Conclusiones aliquot proponuntur ad diuina spectantes ex Physiologia depromptæ. Cap. XI.

Quantum itaque ad conclusiones diuinorum attinet prima conclusio, quæ nobis ope naturalis philosophiæ innotescere potest, sit eiusmodi. Deum esse primum, ac supremum motorem omnium rerum mobilium: cum ipse minime moueatur. Secunda sit hæc. Deus, & intelligentiæ

C extra

Prima conclusio

Secunda conclusio.

extra Cœlum sunt, ita vt non sint nata esse in loco, neque tempus ipsa faciat senescere: Deinde sunt inalterabilia, & impassibilia, optimam habentia vitam, & per se sufficientissimam, totoque æuo perseverant. Tertia à Deo communicatum est esse, & viuere; his quidem exactius; his vero obscurius. Penultima: Deus motu diurno causa ordinis rerum generabilium est. Intelligentiæ vero orbis motu quodammodo, & ratione Diametri Mundi opposito mouentes, cum stellis Planetarū cum circulo obliquo, præsertim solis, causæ, cur vicissime res generentur, & corrumpatur. Vltima Deus rerum omnium Prouidentiam habet.

*Tertia
cōclusio.*

*Quarta
cōclusio.*

*Quinta
cōclusio.*

*Prima Physica conclusio diligentissime explanatur, scilicet
Deum esse mobilium primum immobilem motorem. Cap. XII.*

*Ratio
Aristote-
lis et Pla-
tonis.*

*Theolo-
gorū ra-
tio.*

PRima conclusio ab Aristotele ipso demonstratur octauo Physicorum via motus, quoniam cū omne quod mouetur ab alio moueatur, neque detur processus in infinitum, proinde deueniendum est ad vnum primum Motorem, qui à nullo alio moueatur. Ita etiam via motus illum reperit Plato 10. de legibus. quod etiam Deus sit omninò immobilis, aduersus Poetas fingentes ipsum mutari de forma in formam, ab eodem Platone demonstratur talis, in secundo de Republica: quam rationem etiam admittit Aristoteles primo Cæli. quæ argumentatio ita procedit: Si Deus mutatur; aut ab alio; aut à se ipso; sed neutro modo fieri potest: ergo nullo pacto mutabilis est. Non potest quidem ab alio mutari: quia istud potentius ac præstantius Deo existeret; At nihil melius, aut potentius Deo est, neque à se ipso mutari valet: quia si se ipsum mutaret; aut in melius, aut in deterius; At non datur res, quæ Deo sit melior; neque ulla res est, quæ in deterius mutari expetat. Theologi etiā doctores sancti, inter alias uias, uia hac motus utuntur; ut Deum esse confirment.

ment, ut uidere est apud Diuum Thomam in prima parte summe in quæstione secunda articulo tertio. Similiter statuunt Deum esse immobilem; primo quidem autoritate diuinæ scripturæ: in Melachiam etenim dicit; Ego sum Deus, & non mutor. Secundo vero ratione: quia Deus actus purus existit: quod mutatur cōposita res est ex parte entis in potentia & ex termino motus, qui illi per motum coniungitur. quemadmodum ab eodem Diuo Thoma dictum fuit in prima parte summe quæstione 9. articulo primo.

Secunda Physica conclusio ad diuina pertinet, aperitur.

Cap. X I I I.

SECUNDA conclusio est Aristotelis primo Cæli contextu 100. cuius partes multæ sunt, aliquæ quidem negantes, aliæ vero adfirmantes. Prima pars negans est hæc. Deus, & aliæ Intelligentiæ extra Cælum sunt, idest non continentur ab al. quo corpore cælesti. prima ratio est: quoniam non sunt corpus, nec virtus in corpore. Quæ vero in loco sunt: aut sunt corpora; aut virtutes in corpore. Secunda argumentatio ita formari potest. Si suprema sphaera in loco minime est: & tamen mouetur secundum locum: ergo tanto minus sunt in loco Deus, & intelligentiæ, quæ corporum cælestiū motrices sunt; & non mouentur, quemadmodum 8. Physicorum ab Aristotele demonstratur. Fides nostra Deum & intelligentias extra Cælum visibile esse credit. & ita hucusque fides, & philosophi conueniunt: differunt vero quia secundum fidem; Deus, & Angeli in Cælo Empyreo sunt quod philosophi gentiles minime cognouerunt: tum quia sensu non compræhenditur: tum etiam quia de hac catholica veritate, quemadmodum, & de cæteris, illuminati minime fuerunt. Secunda pars negatiua eiusdem conclusionis est, quod diuina entia non patiuntur a tempore, & sunt inalterabilia, cuius ratio est, propterea quod carent

*Prima
partis ne-
gantis ra-
tio prima*

*Ratio se-
cunda.*

*Quousq;
conueniat
fides cum
philoso-
phia.*

*Secunda
partis ra-
tio.*

C 2 mate-

materia, & contrarietatibus : merito quorum res materiales, & contrarietatis participes, a tempore patiuntur. & alterabilia existunt. In hoc etiam Philosophi cum catholica doctrina consentiunt; secundum quam Angeli creaturæ

Tertia spirituales sunt: & in æternum permanebunt. Tertia est
pars confirmatur huiusmodi. præclarissima entia optimam vitam habent,

& per se sufficientissimam viuunt: etenim vita beata, quæ, quantum ad intelligentias pertinet, in intellectione Dei per essentiam consistit. Quantum vero ad ipsum Deum spectare videtur, ipse in sui intellectione sælix, ac beatus existit. quemadmodum inferius, cùm nonnullas utilitates Metaphysices explicabimus, à me demonstrabitur: Entia uitam optimam, ac per se sufficientissimam habere: hinc patere arbitror. Deus & natura nihil frustra faciunt; sed omnia alicuius finis gratia: & quanto res præclarior existit eo præclarior etiam eius finis est: cum Deus optima res sit: & post ipsum intelligentiæ: Ergo horum entium finis etiam optimus esse certo scitur. In hac etiam philosophi cum veritatibus nostræ fidei consentiunt: fide etenim tenemus, Deum perpetuo in intellectione sui esse felicem & Angelos in Dei uisione. Quarta & ultima pars est; Deum, & substantias separatas toto æuo beatæ uiuere: cuius ratio est; quoniam cum à tempore non mensurentur, non possunt ab illa uita impediri, nec distrahi. Sic etiam philosophi nostri confitentur.

Quarta
pars exponitur.

Tertia Physica conclusio de diuinis agens pulchre declaratur, & confirmatur. Cap. XIIII.

Prima
partis ratio pulchra.
Tertia conclusio principalis huiusmodi est. A primo, id est a Deo, cōmunicatum est esse, & uiuere omnibus, ijs quidem clarius, ijs uero obscurius. Habetur etiam hoc in eodem contextu 100. quod hac argumentatione a me probatur. Si res a Deo esse, & uiuere minime habent; aut id euenit; quia præstantiæ ipsius Dei minime conueniat: aut quia

quia repugnet ipsis rebus . aut Deo , & rebus simul . Non est dicendum id Deo non conuenire : quoniam cū ipse sit summa , & prima bonitas : & bonum est communicatum sui , ut patet de rebus omnibus vniuersi , quarum quælibet , quemadmodum aliquo gradu bonitatis particeps est , ita futuris rebus eam communicat . Quod si id alia , quæ post Deum sunt , præstare uidentur , quanto magis Deus . ita Plato causam finalem assignans , quare a prima causa Mundus productus fuerit , dicit : quia ipsa bona est , & inuidia caret . Theologi similiter asserunt Deum in creandis creaturis eius bonitatem illis cōmunicare uoluisse . Ex parte rerum similiter illis non repugnat , a Deo habuisse esse , & uiuere . Quemadmodum etenim ab ipso , qui Vniuersi Princeps existit , optime gubernantur , sicuti filij a genitoribus ? cui dubium esse potest . quin etiam res omnes a Deo bonitatem receperint , & esse ? Tertio , & postremo . Neque Deo , & rebus simul acceptis repugnat , illi quidem res produxisse ; his vero ab illo fuisse productas . sed maxime congruit , in Dei enim gloriam , rerum omnium cum huiusmodi admirabili ordine productio , ipsa redundat : rebus vero ; quia si ut Dei creaturæ gubernantur , ergo summo eius amore , & summa eius sapientia . sic , ut non sit temendum , aliquam rem ab ipso vnquam negligi . Quo ad secundam *Secunda* partem , quæ erat a Deo clarius , & obscurius rebus ipsis esse , *partis ratio* & uiuere communicatum fuisse . ratio est : quia sic conueniebat conditioni rerum . ut ordo ipsarum , quo ad entitatem , & præstantiam in Mundo existeret , conformiter ordini intelligibili rerum , qui in Deo ipso est . de quo ordine inferius dicitur . Ordo vero in Vniuerso ad eius essentiam , & pulchritudinem necessario conducit . Signum huius , quia eo remoto Vniuersum non esset Vniuersum ; sed Chaos , & confusio . Ex parte vero Dei . intelligibilis ordinis , & pulchritudinis testimonium existit ; & eius sapientiæ ; cuius est ordinem rebus tribuere . Ex parte nostri ; ordo creaturarum ,
velut

uelut scala, est; per quam mente ipsa ascendimus à cognitione rerum minus bonitatis participantium, ad eas, quæ eiusdem magis participes sunt: & eousque quousq; ad Deum primo cognoscendum; deinde amandum, ac colendum perducamur, qui bonitas, ac sapientia existit: Præterea; non solum ex ordine cognitarum rerum in Dei cognitionem deuenire possumus; uerum etiam beneficio ordinis melius huiusmodi rerum omnium, & ipsius Dei præclarissimas notitias in memoria retinemus: quæ etenim ordinationem habent, ut tùm experientia, tum Aristoteles in libro de memoria, & reminiscentia nos docent, melius in memoria retinentur.

Quarta Physica conclusio diuina attingens exponitur. Cap. XV.

PEnultima conclusio principalis similiter in duas diuiditur partes, quarum prima est hæc. Deus mediante motu diurno omnium sphaerarum cælestium, causa est; ut seruetur ordo generationis, & corruptionis. Secunda uero est. Deus, mediantibus Intelligentijs orbes cælestes e contrario mouentibus ab occasu in ortum, & præsertim orbem solis sub obliquo Circulo, causa est generationis, & corruptionis rerum: Accedente etenim sole ad nos, generationes fiunt rerum præstantium: & recedente earum corruptio. Et quia cōtinuo sol accedit, & recedit sub obliquo circulo; propterea continuo generatio & corruptio permanet: Deus uero, mediante motu diurno orbium cælestium ab occasu in ortum, causa huius ordinis existit; Nisi enim orbes cælestes; & primo firmamentum motu diurno moueretur a Deo, qui in supremo circulo apparet, quoad huiusmodi operationem, & motum diurnum, dies, & noctes ordinate sibi inuicem succedente minimè forent. Et si per intellectum, aut imaginationem in solo circulo obliquo sol moueretur, esset utique uniuersa hyems nox una; si ita contingat, & æstas una,

una, dies una; & ut simpliciter dicamus, uniuersus annus, unum diei, noctisq; interuallū hoc est, vna die nocteq; constitutum. quemadmodum dictum est a Ioanne Gramatico in secundo de ortu, & interitu in Commentario 44.

Quinta Naturalis conclusio diuina amplectens, & dilucidatur & roboratur. Cap. XV I.

Postrema, ac ultima conclusio, quæ ex naturali philosophia habetur de ipso Deo, est hæc; ipsum rerum omnium prouidentiam habere, ex Aristotelis sententia. Primo etenim physicorum contextu 81. ex appetitu materiæ, quo ipsa formam, tanquam quoddam diuinum bonū, & appetibile expetit, colligit Themistius secundum Aristotelem Dei prouidentiam. Iste enim materiæ appetitus docet, Deum ordinasse materiam ad formas vicissim suscipiendas: vt corruptione vnius: & alterius generatione, hic continuo generabilia, & corruptibilia seruentur. vt dicitur a Diuo Thoma eo in loco, vbi quid ille appetitus sit, exponit. aut saltem indicium certissimum huiusmodi diuinæ ordinationis existit. Primo Methæororum capite secundo, reddens Aristoteles causam, quare Mundus iste elementaris contagat Mundum superiorem. dicit, vt omnis huius Mundi inferioris virtus ab illo gubernetur. Ecce inquit Alexander eo in loco; quod, secundum Aristotelis doctrinam, Deus harum rerum inferiorum prouidentiam habet. Secundo vero de Anima Contextu 34. dicit idem Aristoteles. propterea ipsis viuentibus tributam esse vim gignendi, vt ipsa per successionem, in alijs, & in specie seruentur. cū id in se ipsis consequi minime valeant: vbi Auerroes dicit, Sollicitudo diuina, cū non potuerit facere ipsum viuens permanere secundum Indiuiduum, miserta est in dando ei virtutem, qua potest permanere in specie, vbi animaduertendum est Deumi, non potuisse facere hæc inferiora in se ipsis semper permanere, non quidem ex aliquo sui defectu, sed quia

*Primus
locus A-
ristotelis.*

*Secundus
locus.*

*Tertius
locus.*

Quartus
locus.

quia contradictionem implicabat, hæc futura esse corruptibilia : vt vniuersum omne genus rerum contineret , & non corrumpi idem ex 4. de partibus animalium capite x. clarissimè haberi potest, vbi ratio assignatur quare est; quod, inter omnia animalia, solus homo erectæ staturæ sit. & dicitur : quia ipse solus intellectu præditus est. vnde vt intelligere diuina possit, ea prius intueri oculis corporis, & circa opera eius humana sapere valeat: propterea rationi consentaneum fuit, vt ad diuina contemplanda promptè se haberet, vt ad inferiora etiam perspicienda : quæ duo facillimè ex huiusmodi erecta statura obtinuit. Ergo patet Deum hominis curam optimam habere, & tanto magis illius, quàm cæterarum rerum inferiorum, quanto magis omnium inferiorum homo præstātiſſimus existit:& quemadmodum genera non sunt præter species, neque species præter indiuidua; ita si Deus hominis in specie curam habet, etiam eiusdem prouidentia in singulari habetur. Multa itaque atque præclara sunt ea, in quibus Philosophia naturalis de Deo cum Catholica fide conuenit, & in quibus illi ob humanæ Naturæ imbecillitatem inferuire valet.

*Veritates aliquot de anima nostra in seipsa vt à Deo est ex
physiologia acceptæ proponuntur, quæ catholica fide
consentiunt. Cap. XVII.*

Consequens modo est, vt a me demonstretur, hanc eandem philosophiæ speculatiuæ partem quam plurimas veritates ad animas nostras pertinentes, nobis non tantum, vt philosophantibus, verumetiam, ut Catholicis exponere. Porro ut anima ipsa nostra, qua ratione a Deo, mediantibus causis naturalibus, huic mortali corpori coniungitur, spectari possit. tum etiam, ut uirtutibus perficiatur: atque exornetur. denique, ut tandem pulchrior effecta, ipsi Deo, a quo procreata est, grata magis fiat: ut ob
uir-

virtutum operationes, auxilio simul diuinæ gratiæ, eodem Deo, vt summo bono, in æternum frui mereatur intercedentibus fide, spe, & charitate diuinitus infusis. Propterea veritates; tùm ad animam ipsam, vt à Deo & natura nobis tribuitur; tum quo ad virtutum genera, quibus informari debet, recensebo; ac easdem ex naturali philosophia deduci posse ostendam. Quantum itaque ad primum essendi modum animæ nostræ pertinere videtur. quinque satis erit, conclusiones statuere; quarum prima sit hæc. Anima nostra, vt intelligens à Deo ortum ducit. Secunda sit hæc. eadem immortalis existit. Tertia, numero multiplicata secundum numerum hominum, & humanorum corporum. Quarta. Anima, ex coniunctione cum corpore, non nihil imperfectionis contrahit. Quinta, & vltima. Post hanc vitam, à Diuina Iustitia, aut præmijs insignitur, aut punitur; pro vt cum hoc corpore bene aut male se gessit.

Prima
conclusio.

Secunda
conclusio.

Tertia
conclusio.

Quarta
conclusio.

Quinta
conclusio.

Prima conclusio demonstratur.

Cap. XVIII.

PRima itaque conclusio (si ad Philosophiam naturalem ipsius Platonis recurramus, quæ præcipue in Timæo continetur) est manifesta. Ibi enim Plato clarissime confitetur, animam nostram à Deo procreatam esse, & productam in eodem cratere, in quo etiam, & anima Vniuersi apud ipsum producta fuit, idest ad exemplar animæ Mundi; quæ, ex huius magni Philosophi sententia, cuncta viuificat, regit, & mouet; & cuius operationes partim cum corpore communes sunt, vt mouere, partim propriæ, vt intelligere, & discurrere. Ita anima nostra corpus istud regit, viuificat, & mouet; & illius operationes partim communes cum corpore sunt, vt vegetare sentire, & mouere, partim propriæ, vt intelligere, & ratiocinari ex quo loco hæ tres veritates ex tanti Philosophi sententia clarissime colliguntur, videlicet animam nostram à Deo crea-

Platonis
authoritas.

D ri.

*Authori-
tas Ari-
stotelis.*

ri. aliquam operationem propriam habere & esse immortalem: reliqua vero: quæ ipse addit de anima mundi. de productione nostrarum animarum ante corpora & alia huiuscemodi ut falsa & rationi & fidei repugnantia. Similiter si naturalem Philosophiam Aristotelis consideremus; animam à Deo oriri luce meridiana clarius videbimus. Nam secundo de generatione animalium capite tertio, quoniam anima intellectiva, ut intellectiva, non utitur in intelligendo parte aliqua corporis, quemadmodum cæteræ inferiores potestates; propterea concludens dicit; Restat igitur, ut mens sola extrinsecus accedat; eaque sola diuina sit: nihil enim cum eius actione communicat actio corporalis. Quibus verbis Aristoteles nihil aliud sibi vult, nisi animam nostram, ut intelligentem, non deduci de non esse ad esse, quemadmodum formæ materiales de potentia materiæ educuntur; sed ab extrinseco conditore, quo cum ipsam cognationem habet. Ita Augustinus sanctus, & alij Doctores catholice Ecclesiæ, ex primis capitibus Moysis in Genesi, eliciunt; Animam à Deo creari formato corpore; & simul in illud iam formatum infundi. Quam ob rem, si iuste vixerit, ad Deum redit, & corpus ad Terram; ex qua formatum est, Idem confirmant, ut videre est apud eundem Augustinum sanctum in libro de Genesi ad litteram. ubi ipse de anima nostra, ac eius immortalitate loquitur, capite 9.

*Theologo-
rum autho-
ritates.*

Secunda Physiologicalica conclusio ostenditur. Cap. XIX.

*Platonis
authori-
tas.*

1. Ratio.

Secunda conclusio etiam à naturali philosophia conformiter catholice fidei determinatur, scilicet; animam nostram esse immortalem, & remanere corrupto corpore, ut patet: quantum ad Platonem attinet in Phædone, in Phædro, in Timæo, & alibi. una ex Præcipuis eius argumentationibus, quæ huiuscemodi tum veram, tum piam sententiam confirmat, hunc in modum formari potest. Anima nostra diuinorum cognitionem expetit, & quo magis ab

ab his rebus corporeis abstrahitur, eò melius, & sincerius aliquid illorum percipit. ergo diuina ac immortalis est, & à corpore seiuncta, optime etiam illa intelliget: At antecedens uerum est. ergo, & cōsequens. Coniunctum deducitur. quantum quidem ad desiderium, quia alioquin frustra animæ nostræ inditum esset, nisi aliquando perfecte diuina intellecturi simus; & cum id nobis in hac uita minime contingat, ob infinita pæne corporis impedimenta, sequitur quòd in alia uita consequemur. Quantum uero ad cognitionem aliquam illorum per excessum mentis, id summi experiuntur philosophantes, ut Mercurius termaximus de se ipso in principio Pimandri asserit. & ut de Platone refert Aristoteles in libro de philosophia, seu Theologia mystica Ægyptiorum, & Assyriorum. Ad hæc Plotinus de se ipso in 8. libro quartæ Æneadis capitulo primo, cuius uerba sunt hæc. Sæpæ quidem experrectus è corpore ad me ipsum, & extra cætera positus, intraque me receptus, pulchritudinem intueor admirandā; tunc confido quam maxime fortis me esse præstantioris. Potest etiam hoc idem ratione comprobari, propterea quod si, cum inforti cogitatione alicuius sumus, amicum prætereuntem minime uidemus: & cogitatio de diuinis ob summam præstantiam, & admirabilis uoluptatis concomitantiam, fortissima omnium cogitationum est? quid mirum, si nos à cogitatione omnis alterius, & inferioris rei, tunc distrahamur; consopitis, & quasi ligatis omnibus facultatibus animæ sentientibus, ac ipsa motrice; ita ut neque etiam respiremus. Vnde magna deinceps respiratione opus est; ut muneri moderatarum respirationum satisficiamus: extra spirando halitus cordis nimis excalefactos, & aerem frigidum pro cordis calore moderando, intus spirando. Ratio Aristotelis. est hæc, & hoc pacto ab ipso formatur. Si anima habet aliquam operationem propriā est separabilis, ac diuina: Sed anima nostra ut intelligens operationem propriam habet, ergo anima nostra, ut intel-

2. Ratio
Aristote-
lis.

D 2 ligens

ligens separabilis, & diuina existit. Maior est eiusdem philosophi primo de Anima contextu 13. Minor atque conclusio etiam ipsius sunt, loco superius citato. uidelicet primo de Generatione animalium capite tertio. Maior probatur propterea quia, si anima panitus mortalis existeret, quoad omnes etiam eius operationes, ob partem materialem per quam posset esse & non esse, materialis existeret. præterquam quod, si aliquam ex eius operationibus sine corpore edit, separate operari poterit; neque frustra crit. Minor probatur dupliciter. primo quidem ab Aristotele tertio de Anima Contextu septimo: quia si intellectio fieret mediante parte organica, sicut, exempli gratia, uisio mediante oculo, & auditio mediantibus auribus læderetur ab excellenti intelligibili. quemadmodum sensatio ab excedente obiecto læso organo. Sed non læditur intellectio, læsa ulla parte corporis: ergo intellectus pars animæ organica minime est. Id quod etiam hæc alia ratione confirmari potest. Si intellectus noster pars organica, & materialis existeret, particeps conditionum materiæ esset, & partium animæ materialium: materiæ etenim est, formas suas particulariter, & signate recipere: sensuum particulariter, & signate recipere, & per illas species res in particulari cognoscere. At intellectus noster per se particularium simulachra non recipit, neque particulariter intelligit: nisi ope sensus, sed recipit species abstracte representantes in vniuersali, & abstractè intelligit. Ergo non est virtus materialis, & organica sed abstracta, & à materia immunis. Argumentatio Aristotelis consimilis esse videtur rationi ipsius Platonis in Dialogo illo, qui dicitur Phædrus vel de Pulchro, quæ huiusmodi est.

Quod per se mouetur, semper mouetur, & ita sempiternum existit. Sed omnis anima, scilicet humana per se mouetur idest, libere corpori dominans, non autem, ut animæ brutorum, quæ potius in suis operationibus à corporis

tempe-

temperie ducuntur, igitur omnis anima humana perpetuo suis motibus, scilicet intellectu & volitione mouetur, & ita est immortalis.

Tertia conclusio explanatur. Cap. XX.

Tertia conclusio sic habet anima nostra intellectiua est numero multiplex secundum numerum hominum. In hac sane tum vera, tum recta, ac pia veritate Plato etiam, & Aristoteles conueniunt. Plato quidem in Timæo dicit, Animas nostras à Deo productas esse secundum numerum Astrorum. In Phædone vult, bonorum animas ad cælum redire, & ibi fæliciter viuere; malorum vero ad loca sub Terra, & ibi puniri. At si vna esset, vt finxit Auerroes, semper eadem manens cum hominibus, qui hic in vita remanent, degeret; Aristoteles vero quamquam animæ nostræ multitudinem nullibi in sua philosophia aperte nobis indicet; potest nihilominus ex eius doctrina deduci his tribus rationibus. quarum prima sit hæc. Illa forma quæ materiæ sensibili coniungitur, ita vt totam minime contineat; & indissolubiliter, numero multiplex est, aut esse potest sub eadem specie. Hæc est ipsius in primo de Cælo, vbi quærit. Vtrum Mundus sit numero unus, aut multiplex, & concludit ipsum esse unum numero: propterea quod uniuersam suam materiã occupat indissolubiliter. Sed anima humana corpori huic sensibili coniungitur, ita ut non occupet uniuersam materiam; nam anima Eudemij tantum eius corpus occupat, & continet, & anima mea solum modo meum & sic de cæteris. Anima igitur humana est multiplicata numero secundum numerum corporum humanorum. Secunda argumentatio sit ista. Illa omnia, quæ ita apparent in omnibus, aut in multis, ponenda sunt rationabiliter. Sed omnis alia forma siue sit coniuncta corpori corruptibili, siue æterno multiplex numero existit secundum numerum corporum,

Authoritas Plato nis.

Ex Aristotelis sententia prima ratio

2. Ratio.

porum . Ergo ita etiam poni ac statui de anima nostra opus est rationabiliter ; quæ actus nostri corporis est . Maior est Aristotelis primo Cæli contextu 102 . Minor quantum ad formas inferiores cæteras ab omnibus conceditur ; & uideamus quod , ut Aristoteles testatur . Si planta , aut lacerta diuidatur , ubi in una planta erat actu una anima , fiunt tot , quot rami abscissi ; sic de lacerta . Quantum ad superiores , intelligentiæ apud Aristotelem sunt tot , quot orbes ; prima causa non adnumerata , ut 12 . Metaphy . ab eodem & ab

3. *Ratio.* Alexandro concluditur , ac determinatur . Tertia ratio sit hæc . Si intellectus noster esset unus numero in omnibus hominibus , cum in Mundo aliquis homo sciens semper sit : sequetur etiam imperitos , qui eundem intellectum habent , scientiam habere . quod Thesaurum eos latebit , & addiscere erit reminisci , non autem nouam scientiam capere . quemadmodum ad hæc incommoda ego in publicis disputationibus aliquando quemdam , qui hoc Auerrois figmentum tunc disputationis gratia substinere uolebat , deduxi . Quamobrem firmiter etiam ex Aristotelis sententia , animas nostras esse tot numero & credimus , & demonstratiue scimus ; quot orbes humani sunt .

Quarta Conclusio demonstratur. Cap. XXI.

Quarta & penultima conclusio erat hæc . Anima nostra , ob unionem cum hoc corpore , non nihil imperfectionis contrahit , & non nihil impedimenti ad beneperfecteque operandum . Id quod probatur , tum auctoritate , tum etiam ratione . auctoritate quidem imprimis ipsius Platonis , ut in Phædone , & in Timæo uidere est : In Phædone dicitur sic . Impedimenta penè innumerabilia corpus præbet propter necessariam eius alimoniam . Præterea morbi nobis hinc incidentes , inuestigationem veritatis impediunt , cupiditatibus , timoribus , multiplicibusq; imaginibus , multis denique nugis nos implet ; atq; alijs id genus pluri-

*Au-
thori-
tas Ari-
stotelis.*

plurimis, vt verissime dicatur, nihil pensi vnquam, ac veri nobis fermè adferre. In Timæo ab eodem Platone statuitur, neminem sponte esse malum; sed ob prauum corporis habitum, & rudem educationem. quæ sententia ita (vt arbitror) intelligenda est, scilicet neminem ex electione tantū errare; sed etiam ex propensione quadam, ex mala corporis temperie procedente. Insuper authoritate Aristotelis eadem veritas confirmatur. Etenim, quantum ad mores at- *Authori-*
tinet, variantur incitationes ad mutationem temperamen- *tas Plato*
ti corporei: vt ipse confitetur primo de Anima contextu 14. *nis.*
qui abundat bile flaua audax est, qui atra timidus. Quantum vero ad intelligentiam spectare videtur. Molles carne apti mente, duri carne. inepti mente, secundo de Anima Contextu 94. Paulus Apostolus, cum stimulum carnis ad *Pauli apo-*
peccandum sentiret, appellabat suum corpus, mortis corpus *stoli au-*
dicens? Infelix homo, quis me liberabit è corpore mortis *thoritas.*
huius? Ratione vero hoc idem demonstrari potest, quia cum corpus hoc nostrum instrumentum animæ sit; si bene dispositum existat, perfecte illi deseruiet; sin minus perperam; quemadmodum Artifex, vt excellens Pictor ex arte, exempli gratia, Alexandrum Magnum representabit, aut Helenam, si penicillos optimos habeat, sin minus imperfecte. Atque multoties contingit corpora hominum male contempta esse, ob malum parentum temperamentum, aut loci, aut etiam ex certa astrorum dispositione in Natiuitate vigente. Quamobrem præclare etiam Plotinus à materia omne malum oriri vult; & non minus scientificè, quam vt vere, Magnanimus indignabatur, cum animam rem ita præclaram, & speculationibus diuinorum idoneam, esse corpori addictam, vt rei imperfectæ, & corruptibili; quod à contemplationibus eam distrahit, perspiciebat. Paulus iterum diuinius de hac re loquutus est, qui diuiniore amore flagrabat, inquiens. Cupio dissolui, & esse cum Christo. Sed hic opus est primo, nos non latere; ne decipiamur, animam nostram

stram ex eius vnione cum corpore non contrahere impedimenta ad bene operandum, & intelligendum. Vitio namque corporis id nequaquam primo contingit; sed ob peccatum à primis parentibus commissum. quemadmodum Doctores Catholici ex diuinis literis eliciunt, quas Plato, & Aristoteles non viderunt; aut si viderunt, minime intellexerunt, vt infideles. Secundo animaduertendum est temperamentum corporis prauum nos impedire quo ad propensionem: quia nos ad contrarium propensos reddit; non quidem cogendo; si quidem intellectus, & voluntas cum potentia immateriales sint, non subiiciuntur per se, & proxime causis corporeis quemadmodum, & verè, & piè à Diuo Thoma s. Physicorū, & in sua summa, sicut & alibi determinatur; cui veritati conformiter Zoroaster locutus est, quando suis in sententijs & præceptis dicat, Ne fatum adaugeas, idest ne causis naturalibus ordine quodam se habentibus, vltra vires animæ materiales, & organicas, insuper intellectum, & uoluntatem eisdem subiicias. Ita nimirum ueritati conformem, & fidei Ptolomæus illam uulgatam sententiam protulit. Sapiens dominabitur astris. Tertio sciendū est, homines sine gratia consideratos, liberæ esse electionis, quo ad actus virtutum moralium, & ciuiliū, quippe qui uitijs opponuntur. Sed quo ad actus meritorios æternæ beatitudinis, ac Deo gratos, opus est, ut cum libero arbitrio adsit diuina gratia, quæ per Christum Dominum nostrum nobis largiatur (nobis tamen consentientibus) ut actiones promere possimus meritorias. quemadmodum uerè, & piè nos docent Doctores sancti, atque Catholici.

Quinta conclusio de anima probatur. Cap. XXII.

QVinta, & postrema conclusio, quam ex naturali Philosophia Plato, & Aristoteles reperiunt, est hæc. Anima nostra, postquam à corpore fuerit separata, aut feliciter

liciter Deum contemplatur, aut infeliciter viuit, idque non minus secundum Naturæ leges quàm diuinas, Si enim Naturæ leges spectemus. in corporibus ipsis primis, ac simplicibus, in supremo loco corpus ipsum cæleste est, velut omnium præstantissimum. In secundo loco descendendo, ignis elementaris constitutus est, qui aere, & cæteris inferioribus nobilior existit. In tertio est aer. In quarto aqua, terraque, & eadem in infimo loco, & quasi, vt materia, quæ desuper omnem perfectionem recipit, collocata est. Ita namq; ratio, & lex naturæ requirit, vt ex animabus nostris, quæ cum prudentia, iustitia ac sanctitate à corpore caduco separantur, locus illis conueniat, vbi Deus est sapiens iustus, ac sanctus, illoq; sempiterno tempore fruatur. Illis vero quæ impuræ sunt, & vitijs obscuræ, sicut à iustis maximè moribus distant, ita nimirum locus infimus, & impurus, & obscurus eisdem congruit, vbi semper infeliciter viuunt, vnàq; torqueantur. Cæterum eorum animæ, qui penitentia ducti sunt ob commissa scelera, sed tamen sine purgatione, & perfecta satisfactione moriuntur, locus purgationis manet. atque ita secundum Naturæ leges Plato Paradisum, Purgatorium, & Infernum confitetur, cum in Phædone, tum in decimo libro de legibus. Aristoteles vero horum trium locorum Animæ non meminit in sua Philosophia; verumtamen hæc inde deduci possunt. ratione sumpta à Naturæ legibus, quandoquidem ipse animas nostras & remanere post corpus confiteatur, & numero multiplicatas existere, quemadmodum superius demonstratum est. Ita lex diuinæ Iustitiæ secundum catholicam fidem, hæc tria animarum loca ponit, & vltius limbum Sanctorum Patrum, & limbum puerorum, qui sine baptismo moriuntur. Hæc de veritatibus ad animam nostram per se consideratam & quatenus a Deo est. dicta sint satis.

E

De

*De anima ut virtutum generibus informari potest, sermo
habetur, ac numerus illarum proponitur.*

Cap. XXIII.

Modo de eadem dicendum est, quatenus ipsa omni genere virtutum informari ac perfici potest. At quoniam partes animæ virtutibus exornandæ sunt, aut mente Dei opera ac Deum ipsum contemplamur, & cognoscimus ope sensus, & discursus, aut voluntate in actionibus ad appetitum moderandum ducimur Prudentia, cui, aut deservit Iustitia, quæ ad appetitum intellectuum pertinet, idest ad ipsam voluntatem, quam etiam vim electivam nominat, aut fortitudo affectus, & actus appetitus irascibilis regendo, aut temperantia gratia ipsius appetitus concupiscibilis temperandi. Propterea ex naturali philosophia ostendam nos cum dirigi, tum inflammari ad omnia hæc virtutum genera.

*Ex naturali Physiologia ad scientiam contemplatoriam,
& præcipue ad sapientiam nos & dirigi, & inflammari.* *Cap. XXIIII.*

Quod autem ex naturali philosophia cum inflammemur, tum dirigamur nunc ostendam. Primum ad scientiam & virtutem contemplatoriam, præsertim ad ipsam sapientiam, quæ in Dei cognitione, & fruitione consistit. Cum enim cognoverimus omnia bona, quæ sub luna sunt interitui obnoxia existere, superiora vero perpetua, diuinaque, ad hæc in nobis esse corpus, quod corruptibile est, animam verò sempiternam; merito his terrenis atque caducis bonis, quantum necessitas postulat, utemur, & ad supremum inde, sempiternumque bonum cognoscendum, amandum, ac imitandum omnibus, tum internis, tum externis actibus, toto animo conuertemur; scilicet ipso tandem

1. Ratio

dem vna cum diuinis mentibus feliciter frui nobis diuina gratia fauente & supernaturalibus adiuti virtutibus, in æternum liceat. Ex naturalium itaque rerum cognitione de recto harum rerum inferiorum vsu admonemur, simul ac ad eundem seruandum accendimur: dein à malis cogitationibus, & operibus, quæ nos remorantur, ac præpediunt, abstrahimur; & ita sapientes efficimur. Namque munera, quæ decent præcipue sapientes, hæc duo præcipue sunt, scilicet recte vti cæteris bonis, quæ vtibilia sunt, & ad Deum fruibile bonum toto animo, atque ardentissimo desiderio adspirare. Secundo cum nobis per philosophiam naturalem ipsam innotescat quamlibet rem naturalem tunc esse perfectam, vbi perfectam operationem secundum suam propriam formam ædit, vt equus cum uelociter currit, & oculus, cum perfectam præstat uidentibus uisionem, Hinc concludimus hominem, cum ipsæ humana, ac ciuili uita uiuere potest, tunc perfecte, ac feliciter uiuere, quando ita secundum rectam rationem uiuat, nam hoc idem est, quod uiuere secundum uirtutem, & præcipue secundum prudentiam longo tempore. Sicut enim neque unus dies, quo ad essentiam facit pulcherrimum, atque desideratum tempus Veris, neque una hirundo nobis, quod dici solet, certo uer pollicetur, aut ostendit; ita neque felix felicitate actiua re uera aliquis est, aut existimatur, quod bonum tum pulcherrimum, tum iucundissimum est; Si unam tantum actionem secundum uirtutem ædat. Amplius quoniam ad bene agendum non satis est intellectum prudentia esse informatum, sed etiam, Iustitia ipsam uoluntatem, fortitudine irascibilem appetitum, ac temperantia concupiscibilem. Ad Iustitiam itaque perducamur oportet. Iustitia in operibus Naturæ cognita, ut pro formarum præstantia, aut maiori, aut minori, materia melius, aut deterius ab agentibus naturalibus à Deo in finem proprium directis ut sagitta à sagittante, & in corpore nostro quælibet

2. Ratio.

3. Ratio.

E 2 pars

pars elementa simul temperata & æqualia continet, non ad pondus, sed ad iustitiam, idest non secundum arithmetica æqualitatem, sed geometricam. Ex his in conceptum, & desiderium iustitiæ distributiue deuenimus. In cognitionem vero atque amorem iustitiæ illius, quæ æqualitate arithmetica utitur, & qua iustitia in commutatione utendum est, eam in indiuiduis eiusdem speciei reperientes, ut in omnibus hominibus ea, quæ speciei necessaria sunt, adsunt, ut anima cum omnibus facultatibus, & corpus cum omnibus eius partibus. Fortitudinem uero ex naturali philosophia consequimur magis quam ex sola Morali: quia cū sciamus corpus nostrum necessario morti obnoxium, ob id, quod materiæ primæ sit particeps, ac elementorum adinuicem pugnantium mortem minime timemus: & ita ad fortitudinem disponimur. Tandem cum delectabilia ipsi sensui ad conseruationem corporis faciant, illi mediocriter adhibita, & quæ dolorem adferunt ad destructionem huius mortalis corporis tendant, hinc fit, ut moderate quæramus assuescere delectabilibus, & circa fugam dolorem adferentium mediocriter intenti sumus, ac ita demum ad temperantiam ducimur, & excitamur naturalis philosophiæ subsidijs huiusmodi.

Ope & subsidio mathematicarum in vniuersali, ad diuinorum cognitionem nos deuenire. Cap. XXV.

Cum itaque satis de philosophiæ naturalis ueritatibus, & fide Christiana, simul ac de bonorum Consensu morum dictum sit, in præsentia docendi methodus exposulare uidetur, ut ad secundam philosophiæ contemplatiue partem accedamus, quæ Mathematica dicitur. Hæc porrò, quemadmodum superius explicatum fuit, in plures distribuitur partes. At, ut in communi prius omnium Mathematicarum scientiarum utilitates tangam, ad Platonem, atque Plotinum,

hum, at ceteros platonicos accedo. Hi sanè unanimiter, quatenus ex eorum scriptis colligere licuit, aperte nobis ostendunt. Mathematicas philosophantibus conferre, quatenus adsuescimus harum interuentu considerationum abstractionibus, quamlibet ab animo confictis: siquidem quantitas imaginatione dumtaxat, non autem vt ipsa deducatur à subiecto, scilicet, vt inde demum ad ea, quæ secundum rem abstracta sunt, erigamur. Quemadmodum enim ex maximè tenebricosa domo, ille qui exire voluerit, in ea morari prius debet, in qua mediocre lumen sit, & in lucidissimam subinde transire, sic Iuuenes anteaquàm à naturalibus ad diuina ducantur, in Mathematicis prius exerceri debent, Ita enim fiet, vt à naturali scientia, quæ res naturæ à particulari materia tantum abstrahit, ad Metaphysicam, quæ à Platonicis Dialectica nominatur, quæ scientia diuinarum rerum, & pœnitus à materia separatarum per medias scientias ascendant: quia mathematicæ magnitudines, & numeros, quæ in rebus sensibilibus sunt, non solum absq; particulari, sed etiam absq; subiecto tantisper vniuersali, considerant. Facilius itaque rerum pœnitus separatarum cognitionem capimus, & credimus, Mathematicis disciplinis assueti prius. Si deinde bonum aliud quod nobis hoc philosophiæ contemplatiuæ genus præstat, Ex Aristotele scire volueris, ipse 12. libro Metaphysices capite tertio nos illud edocet, nempe ipsum pulchrum. Mathematicæ enim ordinem, commensurationem, atque fines, seu terminos rerum examussim contemplantur, quæ species pulchri sunt. Si itaque ex pulchritudine rerum, extra Deum existentium, ad diuinam pulchritudinem ascendere volumus, ad id nobis vtique conferent ipsæ Mathematicæ. Proinde falsum dicunt illi, qui has scientias nihil de bono, aut de pulchro docere aiunt. Sed dicet aliquis? Si Mathematica, ad pœnitus separata comprehendenda ipsis philosophantibus conducit, & immediatius quàm naturalis philo-

*Subsidij
mathe-
matica-
rum ra-
tio 1.*

2. Ratio.

*1. Dubi-
tatio.*

2. *Dubita-
tio.*

philosophia, cur est, quod sapientia, & prima philosophia non dicitur ab ordine addiscendi Mathematica, sed Metaphysica? Secundo Mathematica abstrahit à motu; at finem, & bonum motu consequimur. ergo Mathematicæ de bono minime disquirunt; sicut etiam dicitur ab Aristotele tertio

1. *Solutio
Prime
dubita-
tionis.*

Metaphysices contextu. 3. Ad primam obiectionem. Si quis cum Platonicis entia Mathematica, substantias re, & ratione à diuinis, & à naturalibus distinctas opinetur; ac sustinere velit, aut dicet diuinorum scientiam potius Mathematicam dici debere quàm Methaphysicam, aut sic appellari potius, quia prius à naturalibus, velut à minus abstractis exordium est. Vnde implicite indicatur secundo loco

2. *Solutio*

ad Mathematica entia deueniendum esse. Si vero cum Aristotele, & reliquis Peripatheticis & cū veritate ipsa statuamus easdem esse magnitudines Mathematicas, & naturales quemadmodum in libris Metaphysicis demonstratur, tunc facilius prima difficultas tolli potest, nempe dicendo, quantitates mathematicas naturalibus rebus inseruire, & gratia naturalium esse considerandas. Secundo denominationem fieri à nobiliori & ab eo, quod per se tale. Et propterea prima philosophia potius Metaphysica, quàm Mathematica dici debuit: præterquam quod si denominatio ab eo, quod in re prædominatur, multoties fiat, & in multo pluribus naturalis philosophia primæ est utilis, quam Mathematica, merito hac etiā ratione potius Metaphysica, quam Mathematica dici debet.

*Dubita-
tionis se-
cunda so-
lutio Ale-
xandri.*

Ad secundam instantiam respondet Alexander tertio Metaphysices loco citato, dicens bonum esse duplex, aliud, quod motum terminat, & motu acquiritur, ut bona quæ artifices per artes consequuntur suis artificiosis operationibus, & agentia naturalia motibus ipsorum naturalibus. Huiusmodi bonum in Mathematicis, atque in immobilibus esse non potest. Aliud est bonum quod motum non terminat, sed contemplationem. Istud, ad distinctionem illius, pulchrum dicitur ab Aristotele 13. Metaphysices capite

capite 3. Marcus Antonius Zimara ex Auerroris sententia dicit in Mathematicis non esse bonum per se, sed per accidens quatenus bonum quod cōtemplantur quantitatum, est rerum naturalium. At responsio Alexandri, vim argumenti de medio tollit: obiectio etenim fuit. Mathematicas non esse de bono, propterea quod ipsæ à motu abstrahunt; & bonum motu acquiritur. Præterea in diuinis bonum per se reperitur: & nihilominus non terminat motum proprie dictum, sed motum Metaphoricum, scilicet ipsam contemplationem.

Solutio
Zimare

1. Solutio
approbatur.

*Arithmeticam ad notitiam omnium formarum, &
ad intelligentiam Dei maxime conferre.*

Cap. XXVII.

S Equitur modo, vt particularius nonnullas vtilitates cuiuslibet scientiæ Mathematicæ declaremus, & primo ipsius Arithmetices: hæc etenim numerorum scientia existit, principia, atque affectiones ipsorum considerans: numeris vero formæ ipsæ assimilantur, ac definitiones ab Aristotele octauo Metaphysices contextu 9. secundum Alexandri diuisionem; forma vero diuinum quodam est participatione, atque imitatione primo Physicorum 81. Conueniunt autem formæ ac definitiones cum numeris in tribus, quorum primum est, quia quemadmodum numerus diuisibilis est, & ex indiuisibilibus componitur, ita forma ex indiuisibilibus gradibus constat, vt ex generico, & specificis & non in infinitum. Secundum est quemadmodum si numero addas vnā vnitatem aut remoueatur, iam non permanet eadem species numeri, sic si definitæ rei, & essentiæ, aliquis gradus addatur, aut dematur, non remanebit eadem. Tertium est, quia sicut vna species numeri per aliquid est vna, sic fit per aliquid vna, & distincta ab alia erit. Quo pacto autem formas substantiales per similitudines specierum

nume-

numerorum intelligemus, numeris ignoratis, circa quos arithmetica versatur? Præterea numerorum scientia in cognitionem Dei, & productionis rerū nos ducit: nam quemadmodum omnes numerorum species ab unitate dependēt, ita omnis numerus specierum substantialium à prima Unitate substantiali ortum ducit. Verūm numerus de prædicamento quantitatis existit; quemadmodum & species suorum numerorum sunt. At Deus unitas substantialis, aut potius supersubstantialis est, quemadmodum species rerum substantiæ sunt, & licet numerorum unitas præter numeros non existat, Deus nihilominus præter speciem, & extra species rerum & substantiarum existit. Ex ijs igitur patet, numerorum cognitionem tum ad notiā omnium formarum à prima dependentium conferre, cum etiam ad intelligentiam ipsius primæ formæ, quæ est Deus benedictus.

Geometriam ad animæ & Dei, & aliarum formarum cognitionem non parum conducere. Cap. XXVII.

1. *Utilitas geometria.*

2. *Utilitas.*

Geometriæ similiter nonnullæ utilitates sunt, quarum una secundum Platonicos aliquos est illa, quæ ex prima Euclidis in primo Elementorum demonstratione colligitur. Quemadmodum etenim super lineam rectam ope duorum circulorum se intersecantium triangulus æquilaterus constituitur; ita in corpore humano erectæ staturæ anima procreatur ope duorum circulorum, videlicet Dei, qui circulo assimilatur, quo ad intellectionem, & ope Cæli, quod circulare est. Dei quidem beneficio, quo ad eius creationem, ope vero Cæli, quia eius motu, & lumine virtus horum inferiorum conservatur, ac dependet. Anima item nostra quodam pacto ipse triangulo consimilis esse videtur, quia quemadmodum in ipso tres sunt lineæ, ita in anima nostra tres partes, vegetatiua, sensitiva, & intellectiva. Secunda utilitas Geometricarum cognitionum est, quia quo pacto in eodem

eodem animali, & in nobis ea pars animæ, quæ posterior est ordine compositiuo, priores contineat virtute, nō autem actu, distincte declaratur per similitudinem, seu exemplum figurarum. Sicuti figuræ priores, vt duo trianguli virtute, & non actu, in tetragono sunt, vt ab Aristotele declaratur secundo de Anima contextu 31. Confert præterea Geometria philosophis, & theologis simul ad intelligendum, quo pacto eadem anima re, & quò ad substantiam sit actus corporis organici. Quantum ad inferiores facultates, & partim etiam quomodo extrinseca, & organica existant. Sicut enim circumferentia circuli, quæ linea vna existens circularis, respectu spatij interni cōcaua est, respectu externi conuexa; ita anima nostra vna substantia est, quo ad intellectū quidem, extrinseca, quo vero ad alias partes, intrinseca. Hoc admirabili exemplo vtitur Aristoteles primo de moribus ad Nichomacum capite vltimo. Quantum ad Deum attinet, facilius intelligendum, eadem Geometria multiplicē vsum præstat. Imprimis quidem ope exempli Geometrici comprehendimus, quo pacto intellectio Dei circularis existat. Nā quemadmodum linea circularis ab eo puncto indiuisibili, à quo exoritur, in illud idem, vt in finem terminatur, ita Dei intellectio ab ipsomet qui indiuisibilis omnino est, secundum naturam exoritur, & se intelligendo intelligit etiā se, vt causam vnde omnia procedunt, & vt finis, ad quem omnia tendunt, amore, & desiderio. A principio communicatum est esse omnibus & omnia ab illo, vt ab amato, & desiderato mouentur. Secundo exemplo Geometrico intelligere valemus, tum quo pacto omnia in Deo sint indiuisibiliter, & sub vna natura indiuisibili, & extra quædam diuisibilia sint, & quædam indiuisibilia: tum etiam quomodo idem met Deus, qui indiuisibilis est, & diuisibilia, & indiuisibilia intelligat. Nam sicut in circulo ab vno centro indiuisibili lineæ omnes procedunt diuisibiles, atque etiam puncta indiuisibilia harum linearum, ita Deus, qui indiuisibi-

F lis

6. *Utilitas.*

lis est diuisibilia, & materialia produxit, atque etiam indiuisibilia, & immaterialia, à quibus tamquam Dei ministris materialia reguntur, & quemadmodum si centrum circuli se ipsum intelligeret, indiuisibili sua natura considerata, ut causa, & materialium, & immaterialium, nec in intelligendo aut se ipsum, aut alia à rebus externis, ut nos dependeret. Demum ex definitione corporis, circa quod stereometria versatur, quod in habendo tres dimensiones perfectum est; Primam, quæ longitudo est; mediam, & hæc est latitudo, & ultimam, quæ profunditas nominatur, intelligimus rerum perfectionem in tribus consistere, in principio scilicet, medio, & fine. Hinc fit, ut intelligamus in Deo optimo, & perfectissimo tria existere admirabiliter, videlicet Omnipotentiam, Summam sapientiam, ac bonitatem. Merito bonitatis cæteris aliquam bonitatis partem elargiri voluit. Beneficio sapientiæ ordine quodam omnia rite disponere sciuit. Postremo per omnipotentiam omnia, & bona, & bene instituta in lucem prodidit. Ob omnipotentiam magnopere timendus, ob maximam sapientiam præcæteris venerandus, atque admirandus, ob immensam bonitatem ardentissimo amore illi quilibet coniungi debet.

Vnius astronomiæ subsidio nos ad intelligenda catholica plura adspirare. Cap. XXVIII.

1. *Utilitas.*2. *Utilitas.*3. *Utilitas.*

Tertio loco de astronomiæ utilitatibus dicendum est, & imprimis. Si Cæli enarrant gloriam Dei, id faciunt ut cogniti. Cognoscuntur vero ope astronomiæ, ergo Astronomia gloriam, quam Cæli enarrant, interpretatur. Secundo festorum ordo sanctæ Ecclesiæ pender ex litteræ dominicalis Aurei numeri, & aliorum huiusmodi notitia est astronomica. Tertio quo pacto sanctissime, ac Beatissime Pater inter alia præclarissima opera sua Gregorius xij. hoc etiā agere potuisset, quod fuit à Mense Octobris remouere dies naturales

Ies decem, vt festum Paschatis resurrectionis Domini nostri Iesu Christi: Festum Natalis eiusdem. Festum Annunciationis Virginis: Natiuitas sancti Ioannis; ita solemnitates aliæ Beatæ Virginis, sanctorumque Apostolorum, in diebus conuenientibus eueniant, cuius oppositum prius accidebat? Quo pacto inquam hæc correctio fieri potuisset, nisi auxilio Astronomiæ.

Scientiam harmonicam nos ad diuinam pietatem excitare. Cap. XXIX.

Quarto scientia harmonica, quæ proportionem numerorum in vocibus, & sonis contemplatur, præterquã quod ab ea dependent Musicæ partes, quarum illa, quæ Dorica ab Aristotele, & Platone dicebatur, nos ad virtutes prouocat, & præsertim ad diuinam pietatem, qualis illa est, qua modo Ecclesia utitur; verum etiam nos admonet propterea Deum harmonicis vocibus & sonis laudandum, & colendum esse hac alia ratione, vt testificemur omnibus omnia à Deo harmonicis rationibus procreata fuisse; vt tum pulchritudine diuina participarent, tum etiam, vt ex delectatione admirabili factorum Dei ad diuinam pulchritudinem cognoscendam, & fruendam admirabilibus voluptatibus, & cognitione, & desiderio promoueremur. Hoc fortè Plotinus intellexit, cum inquit, vnã præceteris esse viam, & medium ad separata ascendendi, ipsam videlicet Musicam. Horum finium gratia Diuinus, ac Regius Propheta dicebat. Laudate eum in sono Tubæ. Laudate eum in Psalterio, & cithara. Quod vero res Vniuersi harmonicis rationibus numerorum fabricatæ fuerint, præter rationem adductam ex fine cuius causa accepta est, hac alia confirmari potest: quia si formæ accidentales vt colores, sapes, & odores, cum optime se habent, & valde sensibus placent, ex illarum causis harmonice permixtis resultant. quemadmodum in libro de sensu, & sensibilibus

Harmonicis rationibus res vniuersi à Deo creatas esse.

1. Ratio.

2. Ratio.

F 2 Ari-

Aristoteles confitetur: quanto magis formæ ipsæ substantiales in materia harmonice disposita sunt; & illa harmonia
 §. *Ratio.* cum tollitur à materia derelinquuntur? Et si quælibet forma substantialis, & eius corpus harmonia quadam à Deo mediantibus causis naturalibus coniunguntur, quanto magis omnes formæ, & species simili ratione harmonica Vniuersum ipsum constituunt, ut optimum omnium rerum productarum existat, optimi, & simplicissimi testimonium?

Ope perspectiue quam plurimum veritatum diuinarum nos cognitionem acquirere.

Cap. XXX.

1. *Vtilitas.*

2. *Vtilitas.*

Postremo perspectiua etiã ipsa diuinis ueritatibus conferre uidetur, primo; quia ex triplici modo uidendi, obiectum uidelicet; aut linea recta, ut ea uidentur, quæ per idem medium actu illuminatum, & perspicuum ante nos existentia intuemur; aut reflexa, ut cum nos ipsos, aut alia in speculo uidemus; aut linea fracta, ut cum baculum partim in aqua existit, & partim extra aquam; quod fractum, seu inclinatum apparet, in conceptum uenimus triplicis uisionis intellectualis, qua nos, ut Deum uidere possumus, manu ducimur. Nam aut intellectione directa, & clara, ut in Patria; aut per speculum, in enigmate, idest per cognitionem Creaturarum obscura, & phantasmataria (ut ita loquar) pia, ac uera nihilominus; aut obscura, & aliqua ex parte falsa, qualis fuit intellectio illa qua Gentiles Deum intellexerunt diuersis medijs, suppositionibus interdum falsis utentes. Ergo quatenus à Perspectiua ratio reddetur horum modorum uidendi obiectum sensibile, eatenus admonemur à Theologis, omnium modorum uidendi Deum intelligibiliter assignari posse. Secundo principijs, & rationibus Perspectiue naturalis utitur, cum de Iride loquitur, cuius meminit diuina scriptura, dicens. Iridis apparitionem indicium esse

esse pacti à Deo seruandi cum hominibus, quod fuerat nol-
 le amplius diluuiò vniuersali delere homines, & viuientia
 Terræ, qui Iris mystice, vt dicunt Theologi, Christum no-
 bis significat, in quo tres sunt substantiæ, hoc est diuinitas,
 anima humana, & corpus humanum, quemadmodum in
 Iride tres existunt circuli diuersorum cælorum. Et quem-
 admodum Iris à visibili sole pendet, ita vnio illa trium na-
 turarum ope diuini solis facta est; & quemadmodum ratio-
 nibus partim philosopho naturali cognitis, iris, vt natura-
 lis effectus dignoscitur, & partim rationibus perspectiuæ
 vt idem iris à lineis visualibus, & radiosus dependet; ita ni-
 mirum illa vnio super naturalis, & super perspectiuæ à solo
 Deo intelligitur, & deinceps ab illis, quibus à Deo lumine
 gratiæ reuelatur. Similitudine Iridis qui vnus est, & tri-
 plex à nonnullis philosophis, & catholicis simul aliquo
 modo mysterium Dei, vt ipse est vnus, & trinus, innuitur,
 quod præ cæteris facit Dantes Aldigherius in suo magno
 Poemate Chomicò in tertia parte in fine.

*Iridis ap-
 paritio
 cuius rei
 signū sit.
 Nomi-
 ne Iridis
 Christū
 intellige-
 re scri-
 pturam.*

*Diuinam philosophiam præcæteris philosophiæ parti-
 bus, ad Deum ipsum nos adducere atque
 promouere. Cap. XXXI.*

Sed accedamus iam ad tertiam philosophiæ partem, quæ
 vt omnium aliarum princeps, ac Regina existit, ita Ca-
 tholicæ doctrinæ præstantiori, ac eminentiori modo infer-
 uit. Hac etenim scimus, in primis Deum intelligentem esse, ^{1. Vili-}
 propterea quod, cum præstantissimum omnium principium ^{tas.}
 existat, si intellectio, quæ omnium operationum optima
 est, illi non conueniret, neq; aliqua alia vtrique illi compete-
 ret, & ita ens poenitus ociosum esset. Secundum eandem ^{2. Vili-}
 totam eius substantiam intellectualem esse, & non ratione ^{tas.}
 alicuius partis, vt nos: alioquin Deus non erit omnino &
 poenitus optimus, sed secūdum quid, ratione partis si intel-
 ligen-

3. *Utilitas.*

Ult. utilitas.

*Epilogus
dictorum*

ligentis, ut nos. Tertio, in seipsum intelligendo beatum esse, non autem in aliqua re externa: tum quia aliquid Deo præstantius foret: Tum etiam quia in Deo esset compositio ipsiusmet Dei intelligentis, & obiecti intelligibilis, & beatifici. At in Deo nulla est compositio, neque secundum Philosophos, neque secundum Catholicam, ac firmissimam veritatem. Tertiò Deus perpetuo vita vivit beata, simul cum admirabili voluptate. Probatur vtraque pars huius conclusionis, & primo quod perpetuo: tum quia si nos hic qui cum corpore mortali sumus, aliquando, & imperfecte Deum intelligimus, multo magis ipse qui est æternus, & longe omnium intellectuum perfectissimus & in sui intellectione sua consistit beatitudo, perpetuo in se ipso beatus est. Secundo vero, quod eius intellectiōni beatificæ admirabilis coniuncta sit delectatio: quia si in nobis operatio quanto perfectior, eo etiam delectabilior est, ut præterita beneficio memoriæ, ut præsens, si rei particularis ob sensum; si futura, ob vim sperandi, infuturū ita operare; quanto magis intellectio, qua Deus se ipsum intelligit: quæ omnium operationum optima est cum admirabili, cogitationē omnem excedente, erit voluptate? Postremo Deus vnus est princeps uniuersi: Nam multorum principatus nihil aliud est, quam confusio, & ordinis perturbatio, & res malè gubernantur. Sphærarum uero, cælestium motōres sunt, & ipsi quidem Dij, sed participatione, & uoluntate à primo, eodemque beatissimo intellectu pendent, ut Aristoteles, & Alexander xij. Metaphysices in fine determinant. Hucusq; igitur ex causa efficiente primā philosophiam ortum duxisse docuimus, & ad nos eam aduenisse, cum catholicis ueritatibus consentire, demonstratum est. idq; tum ex ea, quam Philosophia definitionem sibi tribuit, tum etiam ex multiplici eius utilitate in communi, & secundum quamlibet eius partem clare deduximus.

Calum-

Calumniarum numerus recensetur in quibus Philosophia à theologia dissentiens prædicatur?

Cap. XXXII.

Restat modo, ut ipsam à nonnullis ex grauioribus calumnijs defendamus, atq; pro uirili facultate uindiceamus. Id porro commode præstabitur illis prius enarratis, ac in medium adductis, ex quarum amotione rerum facile erit unicuique tum pio, tum perito Philosophanti reliquas tolerare, qualis, inter cæteros Doctissimos, atque summe catholicos uiros, unus est Andreas Camutius, Vir non minus morum probitate, ac diuina pietate singularis, atque admirabilis, quam ob multam omnium facultatum eruditionem excellentissimus. Calumniæ itaque, quibus Philosophia uitio potius, & ignorantia prauæ philosophantium, quam sui ipsius, quæ rebus & Deo conformatur, calumniæ inquam, quibus obnoxia uisitur Philosophia, triplicis generis esse uidentur, aut etenim philosophiæ obijcitur quod malè, atque impiè de Deo statuatur, aut de Angelis, ac Dæmonibus, aut de anima nostra.

Prima calumnia ad Deum attinens proponitur, & suis rationibus munitur? Cap. XXXIII.

Quantum ad Deum attinet, primus Philosophiæ error esse uidetur de scientia Dei. xij. enim Metaphysices Aristoteles & eius Commentator Auerroes statuere uidentur, Deū nihil intelligere extra se ipsum: quia cum alia præter Deum, si cum ipso conferantur, uilia existant; & prout res nobilior aut ignobilior est, ita etiam ipsa eiusdem rei scientia, quando res mensuræ scientiæ sunt: ergo Dei scientia uilesceret. Præterea si Deus omnia intelligeret, aut eius scientia mutaretur de ueritate in falsitatē, rebus ipsis mutatis: ut de scientia nostra cum singularibus applicatur, euenire experimur, aut cuncta ex necessitate essent, & sic à rebus in-

1. Ratio.

2. Ratio.

inferioribus contingentia tollerentur, & à nobis libera electio; ita ut si Deus sciat cras in utero mulieris, uel brutalis fæminæ, hominem, uel brutum procreari debere, non poterit non procreari. Et si sciat, Thomam Cornacchinum, exempli gratia. Medicum præstantissimum cras lecturum esse, non poterit ipse non legere? Sed hæc falsa, & absurda sunt. Falsa quidem: quoniam agentia impediri possunt quominus effectum intentum consequantur, & nos liberæ electionis sumus. ut patet exemplo continentis hominis, in quo ratio cum appetitu sensitivo pugnat, & tandem uincit. In incontinente uero è conuerso appetitus uincit & ratio superatur. Absurda uero sunt: propterea quod uniuersum, ut sit omnino perfectum in testimonium summæ, & diuinæ bonitatis, opus est, ut omne genus rerum contineat; æterna in futurum, ut Angeli, & orbés cælestes sunt; inferiora, quæ esse, & non esse possunt; & hominem qui partim immortalis existat quantum ad animam, & mortalis quantum ad corpus. Et quemadmodum inferiora, & ignobilia ipso homine libera electione carent; Deus uero liber, sed peccare non potest; homo liber, sed potest peccare, sicut etiam Angeli peccare potuerunt. Quare ne falsa, aut absurda cogamur confiteri, melius est (dicunt philosophantes nonnulli, concludere) Deum solum se ipsum intelligere. Tertio eandem, tum falsam, tum impiam opinionem hac argumentatione in addiscentium mētibus adligare contendunt, quemadmodum statux Dedali mobiles funibus adligabantur: ut permanerent. Aiunt etenim. Si Deus præter se ipsum etiam alia intelligit, aut in uniuersali, aut in singulari, aut utroque modo. Sed nullo pacto Deo conuenit alia à se ipso intelligere. Ergo alia poenitus ignorat. Neque enim in uniuersali tantum: quia cum cognitione rerum in uniuersali coire potest ignorantia particularium. Contingit etenim, me scire omnem dualitatem esse parem, & ignorare aliquam esse parem, puta duos nummos in manu socij absconditos, primo

de Ar-

de Arte demonstrandi contextu tertio, & quarto, & ita cum Dei scientia ignorantia etiam coincidere posset. Neq; secundo Deus res in singulari cognoscit quoniam hoc est proprium virtutis sensitivæ, & organicæ, hoc est materialis. Atque Deus purus est intellectus. Neq; tertio modo videlicet, in vniuersali, & particulari simul Deus res dignoscere potest. Namque cognitio fit per speciem sine materia, in singulari quidem per speciem rerum repræsentatiuam in singulari; in vniuersali vero per speciem intelligibilem, quæ res vniuersaliter repræsentant, & tunc aut istæ species ab æterno in intellectu Dei sunt, aut de nouo, vt in nobis, a rebus acceptæ. Sed nullo modo ex ijs dici potest, ergo Deus nullo pacto alia præter se ipsum intelligit. Neq; enim potest dici in Deo esse species & conceptus ab æterno, propterea quod ita Deus res composita foret ex natura intellectuali, vt potentia: & ex illis speciebus spiritualibus, vt ex actibus, & ita haberet partem minus præstantem, & magis præstantem, neque omnino simplex, & optimum ens existeret. Neque secundo modo asserendum est Deum a rebus species suscipere, quibus res ipsas dignoscat, vt nos: alioquin in cognoscendo a rebus dependeret. Et quantum ad cognitionem intellectiuam opus haberet alio intellectu, qui agens, & opifex existeret specierum intelligibilium. Ad hæc, quàm agens, præstantius patiente sit, daretur aliquod Deo præstantius, quod etiam animo fingi minimè potest. Siue igitur Deus ex parte sui consideratur, siue ex parte rerum, siue ex parte modorum cognoscendi videtur nulla ratione fieri posse, vt Deus alia a se ipso intelligat.

*Validissimis rationibus calumnie falsitas probatur &
ex Aristotele, & ex Platone petitis.*

Cap. XXXIIII.

Verum, vt ab hac calumnia Philosophia liberetur, opus est primo eam in principibus Philosophorum contem-
G plari,

plari, in Platone videlicet, ac Aristotele, ex quibus oppositum elicitur. Deinde argumentationibus in contrarium adductis faciendum est satis. Quantum ad Platonem attinet ipse confitetur x. de legibus Deos omnia cognoscere, nihilque eos effugere posse eorum, quæ aut sensu, aut intellectu percipiuntur a nobis, nec obstat si dicatur Platonem eo in loco tamquam legalem philosophum verba fecisse, ut populis persuadendo uidelicet huiusmodi sententiam ipsi promptiores forent ad leges obseruandas timore diuinæ Prodentia, & Iustitiæ, sed re uera Platonem eundem ita non sensisse, non ualet inquam, non ualet hæc impiorum euasio, siue fuga turpis, propterea quod si Deus rerum omnium secundum Platonem opifex est, & recta ratione res fabricatæ sunt, sicut artificiosa ab excellenti Artifice, ergo mediante illarum scientia, nam alioquin, aut praue se haberent, aut casu, & fortuna ita essent. At casus est causa per accidens atque fortuna quæ causas per se præsupponunt nempe naturam, & intellectum. Ergo primum a natura, vel ab intellectu. Non a natura, quod hæc ab intellectu dirigatur. Igitur ab intellectu Dei sciente rerum rationes. Quantum uero ad Aristotelem attinet ipse imprimis pro inconuenienti habet aduersus Empedoclem primo de Anima, Deum pauciora intelligere, quam nos intelligamus. Secundo si Deus ex Aristotelis sententia se ipsum intelligit aut se ipsum tantum, ut Deus, aut ut causam primam omnium efficientem, formalem, & finalem. Si primo modo, ergo imperfecte se intelligit. Si etiam secundo modo, igitur in relatione ad causata, & sic intelligens unum relatiuorum intelligit & aliud. Ergo etiã alia Deus ipse intelligit. Tertio xij. Metaphys. contextu xxx. secundum Alexandri diuisionem. Bonum Vniuersi duplex est, quemadmodum, & bonum ipsius exercitus: Huius etenim bonum unum est ipse Dux, aliud est ordo, qui ab ordine in animo Ducis existente dependet. Ita nimirum uniuersi bonum est ipse Deus & ordo qui ab ordine

ne.

ne intelligibiliter in Deo regitur. Si ergo secundum Aristotelem in Deo est ordo intelligibiliter, & ordo est rerum ordinabiliū ordo, sequitur quod modò intelligibili etiam res ipse in eo existant. At quia dicent hic haber, i Deum solum, nempe res vniuersaliter intelligere, propterea ostēdo ipsum etiā singulares res cognoscere, quia Deus cū sit maxime in actu, cuiusmodi etiam scientia singularium est; propterea Deus potius in singulari res cognoscit, vt hac ratione concludit Auerroes in sexta disputatione aduersus Algazelem, dicens, scientiam Dei magis esse similem scientiæ indiuiduali quam scientiæ vniuersali, quod etiam operationi Dei erga hæc cōgruit. Cum enim operatio eius circa singularia sit, vt singularis circulatio, & illuminatio, & conseruatio etiam rerum singularium, & omnia hæc recte se habeant, sequitur quod a cognoscente Deo sint. Itaque sub quacunque ratione Deus spectetur ipse omnia cognoscere conuenit.

*Detraкторum & calumniantium rationibus radicitus
euelluntur ac dissoluuntur. Cap. XXXV.*

MOdo consequens est vt rationibus in contrariū adductis respondeatur. Ad primam itaque dicatur, scientiā Dei præ cæteris a nostra differre, quia nostra est causata a rebus, scientia vero Dei minime, sed ipsa rerum causa est, ac dum se ipso intelligente intelligit eius entitatem, & bonitatem sub diuersis quoque gradibus potest alijs communicari clarius, & obscurius, & ita cum scientia Dei non pendeat vt nostra a rebus, propterea non vilescit. Aristoteles igitur non negabat Deum alia intelligere, sed modum scilicet, non vt nos. Ad secundam est dicendum, imprimis scientiam & præscientiam Dei non imponere necessitatem rebus futuris; quemadmodum enim homo in Turri existens præuidet hominem euntem in desertum a latronibus occidendum, cum alioqui non cogat illum illuc proficisci. Quin imo se dum

G 2 ille

ille in desertum tendit, reuerteretur ad locum, vnde discessit idem existens in Turri præuideret eundem saluari, neque ob hoc cogeret, ipsum regredi, & saluari. Secundo respondendo ad vim argumenti, dico rerum necessitatem duplicem esse posse, alteram simpliciter, & absolute, quæ rebus competit ex illarum principijs necessarijs, ac ita necessario propriæ affectiones, a principijs res subiectas constituentibus fluunt, vt aptitudo ad ridendum in homine ab anima rationali, & hinnibilitas ab anima equi. Alia est necessitas conditionalis, & ex suppositione, vt si canis currit necessario mouetur, & cum hac necessitate copulatur etiam contingentia, aut libertas. Sanè primo modo Deus necessitatem rebus minime imponit quando minime sit principium rei compositæ constitutum. At qui secundo modo necessitatem imponit, & ita si supponitur Deum præscire cum determinatione, filium alicui esse procreandum in vtero matris, necessario procreabitur. Sed si potest impediri procreatio etiam istud cognoscitur a Deo: ita vt ipse intelligat necessario futura, tamquàm necessario euenientia, & contingentia, vt continenter. Quod si dicant aduersarij hac solutione non capimus quo pacto alterum saltim ex ijs absurdum non sequatur, scilicet, aut scientiam Dei esse mutabilem, aut tolli a rebus contingentiam, & a nobis liberam electionem. Respondendum est, quod si ex hoc inferant. Ergo Deus alia minime intelligit, non tantum impie loquuntur, verum etiam falsa turpiter effutiunt, quemadmodum superius demonstratum fuit a me, tum autoritatibus Platonis, & Aristotelis, & Auerrois, tum etiam rationibus. Sin autem id dicant imbecillitatem humani ingenij, & humanæ sapientiæ confitentes, verè profecto, & modeste, loquuntur. Plurima sunt enim apud nos quorum causam numquam cognoscere, nec reddere ullus ex Philosophantibus potuit, puta qui magnes ferrum trahat, Torpedo manum stupore afficiat, Scamonea bilem ducat, & aliorum huiusmodi, quæ apud nos sunt & sensibus

bus vnde ortum ducit omnis nostra humana cognitio exposita sint. Quanto minus itaque diuinarum cognitionem assequi possumus. Præterea si pueri cogitationes, & discursus hominum adulatorū circa agibilia, minime percipiunt & rationes, neque homines imperiti discursus sapientum & eruditorum, tanto minus hi cogitationes Dei, & quo pacto Deus res intelligat intelligere poterūt cum longe magis sapiēs a Deo, quo ad præstantiam intelligentiæ distent, quàm puer a viro, & quàm vir imperitus a perito. Ad tertium, & vltimum argumentum, cum dicebatur. Si Deus alia a se ipso intelligeret, aut vniuersaliter, aut singulariter, imprimis dico cum Auerroe loco superius citato in sexta disputatione in Deo esse numerum scibilium, & scientiam Dei numerum scibilium continere, sed longe aliter quàm scientia, quæ in anima nostra est. Scientia etenim humana dupliciter est multiplicata vno modo secundum numerum scibilium in phantasia existentium quibus res singulariter cognoscuntur, alio pacto secundum numerum specierum intelligibiliū in intellectu potestatis, quibus speciebus vniuersalia in multis intelligere possumus. At scientia Dei neutro modo ex ijs numerum scibilium continet, sed ibi est numeratio quam compræhendere non potest intellectus noster, nisi intellectus noster idem esset cum intellectu diuino, quod est falsum, & impossibile quemadmodum dictum est ibi ab Auerroe. Secundo ad vim argumenti dicendum in eo vitium esse in diuidendo propterea quod res a Deo neutro modo eminentiori tamen cognoscuntur, quam per species sensibilium: Quare concludit argumentatio, cum in ea ab insufficienti partium enumeratione procedatur. Theologi etiam dicunt, in Deo esse rerum omnium Ideas, seu rationes, aut exemplaria: non quidem, vt species re, & ratione distinctas ab inuicem, & ab essentia Dei, cum Deum actum purum sicuti, & philosophi esse statuunt. Sed modo quodam eminentissimo, & inexplicabili: quatenus Deus se ipsum

sum intelligit in relatione ad alia intelligendo suam diuinā essentiam, & sic diuina essentia rationem Ideæ habet, non autem vt eadem diuina essentia ad ipsum Deum refertur quemadmodum vere, ac piè determinatum est à Diuo Thoma in prima parte summę in quæstione xv. articulo primo, & exquisitissime huiuscemodi veritas ibidem defenditur ab ipso Thoma, & Caetano atque exponitur.

Secunda calumnia in medium adducitur et simul atque rationibus fulcitur. Cap. XXXVI.

SEcunda calumnia quæ philosophiæ ascribitur est hæc, quod eius sectatores negent, res à Deo ex nihilo fuisse productas. Plato etenim in Timæo asserit Deum ex inordinatione ad ordinem res ipsas reduxisse. Et ita supponit res confuso modo, & inordinate ab æterno fuisse, non autem ex nihilo genitas. Aristoteles vero primo Physicorum contextu xxxiiij. inquit omnes naturales philosophos in hac sententia conuenire, quod ex non ente, idest ex nihilo nihil fiat, & inferius tum rationibus ducentibus ad inconuenientiam, tum rationibus directe concludentibus in omni re quæ fit prærequiri materiam demonstrat. Confirmatur etiam, quia omne quod producendum est, aut motu fit, aut generatione quæ motum præsupponit. Motu quidem alterationis circa aliquod vnum ex tribus elementis secundum raritatem, & densitatem, aut circa aliquod medium inter aerem, & aquam, aut inter aerem, & ignem, vt circa vaporem fiebant res secundū Physicos primæ sectæ. Thales etenim Milesius omnia composita naturalia ex aqua densata, aut rarefacta fieri existimabat, ita vt si quis ipsum interrogasset, quid est terra aut os aut lapis, respondisset esse aquam magis densatam. Diogenes ex aere rarefacto vel densato. Heraclitus ex igne similiter densiori, aut rariori facto. Sic qui vaporem ponebat ex ipso similiter res fieri credi-

credidit. Inter hos etiam connumeratur Plato ab Aristotele primo Physicorū xxxij. nisi quod illi duo principia formalia ponebant rarum, & densum, & vnum loco materiæ: Plato vero è conuerso videtur ponere duo ex parte materiæ, cū eam duplici nomine appellaret magnum, & paruum, & vnum ex parte formæ. Secundum vero Physicos secundæ sectæ, composita ex pluribus principijs componebantur, quæ, aut numero finita erant, vt apud Empedoclem quatuor vocata Elementa, scilicet Ignis, Aer, Aqua, & Terra, vt materialia. Agentia autem dixit esse amicitiam, & litem, illa quidem congregando huiuscemodi Elementa ea confundeat, & fiebat Chaos. Si vero lis vincebat amicitiam. Separabantur ab inuicem, & constituebatur Mundus quò ad partes maiores, & simplices, ex quarum particulis amicitia illas confundente & cum temperamento fiebant mixta, & dominante lite destruebantur. Aut principia erant ita plura, vt essent numero infinita, quæ aut erant eiusdem substantiæ, & indiuisibilia corpuscula per vacuum volitantia, & casu ad constitutionem compositi concurrebant solum differentia figura ordine, & situ, quæ fuit opinio Democriti Leucippi, Epicuri, & Lucretij. Aut erant numero, infinita, & in natura differentia scilicet infinitæ partes similes olim in quodam Chaos simul permixtæ, & deinde ab intellectu diuino ex illo Chaos segregabatur, & congerie simul iungebantur vt partes ossis cum osse, partes carnis cū carne, & ita fiebant partes similes. Deinceps ex ijs ab eodem intellectu congregatis fiebant mixta organica, vt corpora plantarum sunt, animalium, & hominis. Demum ex Aristotelis, & aliorum Peripateticæ, & tertiæ sectæ opinione res fiunt generatione, cui annectitur motus alterationis, per quam materia ad nouam formam disponitur. Cum igitur omne quod fit, motu fiat, aut non sine motu & motus sit actus entis mobilis, & inter contraria, quæ etiam in subiecto recipiuntur, inde consequitur, quomodocunq;

res.

res fiant, ex materia præexistente fieri, non autem ex nihilo.

Iaciuntur fundamenta tria quibus acriter detractorum calumnie pro explodantur, & omnia ex nihilo creata fuisse quomodo intelligendum sit exponitur. Cap. XXXVII.

VT philosophia ab huiusmodi maximo errore purgetur, imprimis propono hanc distinctionem generationis rerum de nō esse ad esse. alia sine motu est, & à Simplicio octauo Physicorum generatio non temporanea dicitur, propterea quod, cum sine motu sit, qui tempore mensuratur, etiam sine tempore est. Hæc eadem ab alijs nonnullis simplex rerum emanatio appellatur, & a Theologis nostris creatio, quæ rerum ex nihilo productio est. Alia est generatio illi opposita, quæ ab eodem Simplicio temporanea dicitur, quia cum motu est, qui tempore mensuratur. Secundum Platonem, & Aristotelem agens primum generatione nō temporanea omnia produxit, sed ab æterno, quemadmodum ex horum maximorum Philosophorum sententia Simplicius, ac Diuus Thomas firmiter tenent, & vt inferius rationibus, hoc idem a me demonstrabitur. Secundo vero modo generatione temporanea res ingenitæ omnino sunt; licet quoad has inferiores, & ab agentibus secundis post Deum quotidie fiant, vt saltem in vniuersali seruentur. Secundo igitur modo negant naturales philosophi omnes ex nihilo ab agentibus secundis, & modo naturæ, quæ principium motus est, res produci. Deinceps id exponere oportet, in quo sensu cum quæritur, si aliquid ex nihilo fieri possit, secundum Philosophorum sententiam, id intelligi debeat, & duobus quidem modis intelligi posse dicendum est. Vno pacto sic quod illa dictio, ex omne genus causæ significet, & ita erit sensus; aliquid ex nulla causa fit. Si hoc pacto intelligatur falsum, ac impossibile existit. Quis enim

enim animo capere potest res, prius nullo modo existentes, per se ipsas de nihilo ad aliquid deductas esse. Secundo aut ex nihilo, solum causam materiale[m] denotat idest ex nulla materia, & istud rursus dupliciter exponi potest, aut respectu omnium creaturarum, sic, vt ex nulla materia constent, id quod de materialibus falsum est. De immaterialibus, vt de intelligentijs, & anima nostra verum existit. Hæc etenim omnia a Deo ex nihilo creata, vel nulla in eis existente materia fuerunt. At materialia ex nihilo facta dicuntur esse, quia prius materia creata fuit, quæ in illorum compositionem simul cum forma substantiali remanent, vt primo Physicorum lxiij. ab Aristotele demonstratur. Tertia suppositio sit hæc, res a Deo creari, a se ipso inquam tantum verum est, sed a se ipso, vt simul cum alijs agentibus operatur, falsum, & impossibile est. Vtraq; pars huius distinctionis ex mox dicendis apparebit. Imprimis itaq; autoritatibus, secundo rationibus ostendo, omnia a Deo creata fuisse. Prima autoritas in primo Topicorum continetur, vbi Aristoteles, exemplum adducens problematis, quod pro vtraq; parte sustineri potest, dicit. Vt vtrum Mundus æternus, & ingenuus sit, aut non æternus, sed genitus: Nam si argumenta a definitione motus propriæ dicti petantur, qui generatione temporaneæ connectitur, ita teneri poterit, nempe Mundum non fuisse genitum; nec futurum corruptibilem corruptione, quæ motum secum habet, vt arguit Aristoteles octauo Physicorum, & primo Cæli. Si vero argumenta a generatione non temporanea accipiantur, ita Mundus genitus a Deo est, & in nihilum verti posset. Secunda autoritas est in primo de Cælo, & est contextu 100. vbi inquit Philosophus, a primo communicatum est esse, & viuere omnibus, ijs quidem clarius, ijs autem obscurius. At qui communicare esse, est gignere; quemadmodum habere esse aliunde, generari existit, & si omnibus, ergo etiam Intelligentijs quæ, cum ex nulla materia constent, ex nihilo sint o-

H por-

Tertia
suppositio.

portet. Eadem ratione porro, si omnibus, etiam ipsi materiæ primæ conueniat id, necessarium est, alioquin materiæ esset materia, & sic in infinitum.

*Rationibus validissimis confirmatur à Deo
omnia fuisse ex Nihilo creata.*

Cap. XXXV III.

QUod ad rationes autem attinet, sicut motus, & mutatio cum tempore actus mobilis, aut mobile est, a motore existit tertio Physicorum, ita si creatio datur, est actus. eritq; in rebus creandis, vt creandæ a Creatore. Proinde argumentabor tum a Creatione, tum a Creaturis, tum ab ipso Creatore Deo, vt omnino, & penitus ab iplo Deo omnia fuisse creata, non solum secundum catholicam veritatē ostendam, verum etiam ex Aristotelis sententia. Primo itaq; **i. Ratio.** ratiocinor, argumento accepto ab ipsa creatione. Si datur creatio apud nos, quæ ab agētibus istis fiat per similitudinē, datur etiam creatio rerum ab agente primo, sed antecedens verum est, ergo, & consequens verum vtiq; erit. Quod autē creatio apud nos per similitudinem detur, ostendo: quia formæ materiales, quæ de potentia materiæ ab agentibus de non esse ad esse deducuntur, quasi per creationem fiunt, ut Auerroes confitetur xij. Metaphysices; quod etiam ostendo quia quatenus huiuscemodi formæ non latitabant in materia, nec aliquid illarum ibi aderat, dicuntur creatæ; sicuti cum esse desinunt, in nihilum redeunt: quatenus uero ex materia educuntur, & materiam relinquunt non sunt creatæ. Ecce igitur quod huiuscemodi formarum productio ab ijs agentibus, partim est creatio, & partim non. Hæc a Diuo Thoma concreatio, appellatur; ab Auerroe quasi creatio, ab Aristotele creatio aliquo modo, & secundum quid diceretur. Primum connexum deducitur propterea quod illud quod est tale per similitudinē, præsupponit id, quod propriæ
tale

tale est, ut lapides, qui honorantur, ex quibus aræ fiunt, fortunati dicuntur per similitudinem cum hominibus qui honore afficiuntur; è contra lapides extra aras, qui pedibus conculcantur dicuntur infortunati per similitudinem hominum vilium, qui spernuntur, vt secundo Physicorum dictum, ac determinatum est ab Aristotele. Quocirca si in animalibus brutis, & in pueris morum similitudo est, vt octauo de Historia animalium à principio recenset Aristoteles; inde sequitur quod, & in hominibus vsum rationis habentibus mores proprie dicti reperiuntur. Si Philosophantes auxilio theorematum ipsius philosophiæ Deū, ac cætera intelligunt, & in recta ipsorummet gubernatione Deo assimilantur pro viribus, qui Deus propriè, & perfectissimè se ipsum & alia non intelliget, atq; gubernabit? Secundo arguo ratione à creaturis ipsis petita hunc in modū. ^{2. Ratio à creaturis.} Si omnia præter Deum entitate, & bonitate participant, igitur ab ipso creata sunt: nam alioquin non penitus entia per participationē forent; sed reliqua sunt entia per participationē, sicuti participantia caliditate à primo calido. ergo omnia à Deo creata sunt. Tertiò & vltimo ex parte Dei sic ^{3. Ratio à creatore.} arguitur. Quanto agens est superius, ac præstantius, tanto minus supponit de materia, vt agens naturale, quia superius & præstantius est artifice, vbi artifex in operando supponit materiam, quæ ens actu est, vt statuarius lapidem, aut æs: ædificator lateres, lapides, & ligna; naturale agens materiam, quæ ens in potentia existit, præsupponit. Sed Deus naturali agente, & artifice superior, & præstantior existit, ergo in producendo, supponet id, quod minus quam ens in potentia, & quam ens in actu sit, id autem est ipsum nihil, ergo Deus ex nihilo valet omnia gignere. Hanc tertiam argumentationem nonnulli debilem esse conantur ostendere, imo potius destruere, sic argumentantes. Si Deus quia naturali agente, & artifice superior & præstantior existit minus ^{Obiectio contra adductā rationē ex creatore.} materiæ supponit, idest, nihil; eadem ratione quælibet in-

H 2 telligen-

telligentia, quæ a Theologis Angelus nominatur, creare poterit; cum sit etiam Angelus supra artem, & supra naturam. Id quod non modo contra fidem est, verum etiam fieri minime potest: Si enim Angelus ex nihilo res de non esse ad esse deducere posset, cum Deus supra Angelum sit, inde deducitur, Deum eo, quod sit minus quam nihil, producere, sed id est impossibile. igitur in producendo cum Dei, tum Angeli virtus æqualis fuerit. At qui respondeo, quod quemadmodum si centum homines Nauim trahant, nonaginta nouem eam minime trahent; Si his addatur loco centesimi hominis puer, aut debilis illam minime trahent. Ecce non quilibet virtutis excessus sufficit, sed opus est centesimo homine robusto. Quamobrem simili ratione non satis est virtus Angeli ad creandum, etiam si eius vis robur tum artificis, tum agentis naturalis excedat, sed opus est virtute infinita in vigore, quæ in solo Deo est: si namq; foret in Angelo virtus eadem, tunc Angelus æqualis Deo foret, & ita Deus minime Deus existeret, & ipse Angelus esset Deus, & non Deus, quod contradictionem implicat, & fieri minime potest. Quod autem opus sit in creatione uirtute infinita, ostenditur: nam quemadmodum inter purè nihil, & aliquid infinita est proportio, ita infinita uirtus in uigore requiritur, quæ aliquid de non ente penitus ad esse hoc aliquid perducere ualeat. Sed contra rursus nonnulli instant, dicentes, In hac responsione, & in creatione propriè dicta infinita uirtus in uigore in ipso Deo supponitur, quod Aristoteli repugnare uidetur: Si quidem octauo Physicorum ostendat primum motorem uirtutis finitæ existere, cum in tempore moueat. Si enim infinitam haberet vim; Cælum in non tempore moueret, quando uirtus quanto maior, tanto uelocius moueat. Quare si in infinitum sit maior, infinita uelocitate mouebit. Si dicatur infinita uelocitate, sed non ob id in nō tempore, sed in tempore imperceptibili. contra sic etiam uirtus finita mouere posset, & ita tantum posset quantum

uirtus

*Obiectio-
nis dispo-
nitio.*

*Obiectio
contra re-
sponsionē*

virtus infinita, & tantum minor, quantum maior in infinitum. Ad hanc argumentationem dicendum est, mouens esse in duplici differentia. Aliud quidem mouet naturaliter, vt hæc mouentia inferiora, quæ integra illorum potestate, totisq; viribus mouent. Aliud vero liberè intellectu, & voluntate, vt Deus, & homo. Huiusmodi ab illo distinguuntur, quia hæc non quantum possunt, sed quantum volunt, mouent. Exempligratia potest quis aliquem ante se existentem mouere leuiter, vt ipsum à se remoueat, & potest vehementissimè, ita vt ad terram illum proijciat. Ita Deus mouet quantum uult Cælum, & non tota sui potētia. Quare cum eius uoluntas optima sit, idcirco non quanta potest, sed quantum expeditijs inferioribus lumine, & motu gubernandis, atq; conseruandis cælum mouet. Itaq; ratio Aristotelis concludebat, si Deus naturali modo, & uniuersa eius potestate in mouendo uteretur. Contra rursus instant aliqui duplici ratione arguentes. Altera ducendo ad inconueniens, & altera directè concludente. Illa porrò, quæ ad inconueniens deducit, huiusmodi est; quia si Deus infiniti vigoris sit, & eo, infinito non utitur in mouendo, sequitur quod frustra sit eius infinita uirtus, quod absurdum est. ergo in Deo infinitam esse uirtutem in uigore non est dicendum. Altera ratiocinatio, quæ directè concludit, sic habet. Si Dei scientia finita est, eius quoque potentia finita erit, si quidē æqualia in Deo comperiantur scientia, potentia, & bonitas. At scientia Dei finita est: nam est causa rerum uniuersalium quæ finitæ sunt, alioquin inter illa ordo nusquam esset. Quāquam finita uisitur Dei scientia quatenus singularium est. Hæc uero secundum fidem finita sunt, cum Mundus deficere debeat. Secundum Platonem autem, & Aristotelem, qui eum numquam interiturum, nec incepisse Mundum credūt, singularia sunt infinita successione. Proinde secundum fidē etiam ex singularibus numero finitis in Deo intelligibiliter existentibus, & unde hæc realiter procedunt. Deus finitæ,
& non

& non infinitæ uirtutis in uigore esse uidetur. Secundum uero Philosophos infinitæ quidem uirtutis apparet in duratione, non autem in uigore. Ad primum itaque argumentum, negatur potentiam Dei esse frustrâ si ea infinita, ut infinita non utatur in mouendo Cælum, quia satis est quod ea usus sit in productione omnium rerum uniuersi ex nihilo, ut demonstratum superius fuit, & quod eadem utatur in animabus nostris creandis. Ad secundum imprimis dico, Deum esse infinitæ uirtutis ex duobus patere posse, quorum primum est, quia se in ipso Deo, ut in primo ente omnia æqualiter se habent, quemadmodum ipse infinitæ uirtutis est, & à parte ante, & a parte post, quo ad durationem: ita etiam quo ad uigorem. Intelligentiæ, autem & animæ nostræ infinitæ uirtutis in duratione in futurum sunt Deo ita uolente qui illas à materia hac, & à contrarijs exemit, & operationem propriam illis tribuit: sed finitæ uirtutis in uigore sunt. Cætera porro quæ apud nos sunt utpote magis adhuc a Deo distantia cum perfectione, tum situ finitæ uirtutis sunt utroque modo scilicet, & quo ad uigorem, & quo ad durationem. Alterum est, cum Dei uirtus infinita a philosophis, ac Theologis ostendatur, modus ipse considerandus est quo rebus cunctis esse & uiuere dedit, cum prius extra ipsum nullo modo existerent, quemadmodum superius tū autoritatibus, tum rationibus demonstratum est. Deinde ad uim argumentationis respondens, dico scientiam Dei posse dupliciter considerari. Primo quidem, ut ipsius diuinæ essentiæ cognitio est, quæ infinitæ perfectionis existit, & ita infinita est rei cognitio penitus, & omnino, quo ad perfectionem & quo ad utrumque modum infinitatis uirtutis, ut superius expositum est. Secundo uero modo, ut refertur ad res extrinsecas, quibus ordine quodam esse, & uiuere a Deo communicari congruit, & ita Dei scientia finita esse uidetur, sicut & eius uirtus, extensiuæ. Tertio dicatur uim infinitam Dei intensiuæ ex modo productionis nobis manifestari,

stari, non autem ex numero finito rerum ad extra existentium, quæ in Deo intelligibiliter sunt. Theologicè potest dici Deum scire infinita, & infinitas species posse creare ex parte suæ potentiæ absolutè consideratæ. sed respectu suæ potentiæ, & scientiæ, vt referuntur ad res creatas videntur finitæ.

*Philosophiæ ac Theologiæ in quibus differant, & quedam
problemata ad mundi creationem continentia
dissoluuntur. Cap. XXXIX.*

EX omnibus ijs patere arbitror iniustè reprehendi Philosophiam, circa creationem, cum ipsa Deum omnia creasse confiteatur conformiter doctrinæ diuinitus reuelatæ, ac longe melioris existentis, quam sciëntia principiorum, aut conclusionū, quæ more sit philosophica. Solum etenim differunt abinuicem Theologia & Philosophia Platoniorū, & Peripateticorum in duobus, quorum vnum est quod illa ponit rerum creationem de nouo. In principio, dicit Moses in Genesi, creauit Deus Cælum, & Terram, idest in principio temporis cum tempus esse cœpit. Hanc vero ab æterno rem à Deo emanasse asserit, quemadmodum si pes alicuius in arena existens sempiternus foret, semper etiam ibi vestigia relinqueret, & solum pes prior natura ipso vestigio esset. Et quemadmodum apud philosophos Sol perpetuo fuit, & erit, & perpetuo inde emanauit, & effluxit lumen, atq; perpetuo emanabit & effluet, alioquin non vident quo pacto si bonum erat vniuersum creare ab æterno non sit facta aliqua mutatio in Deo ipso, aut aliquod esset Deum impediēs, quin ab æterno ipsum mundum non procreasset: sed venia digni sunt ipsi Philosophi quia carētes vera omnino scientia diuinorū, diuinitus reuelata, arbitrati sunt de diuinis omnino vere, & copiose ipsorum humana sapientia posse iudicare. Cum vero quærunt Philosophi gentiles de causa quare Deus non ab æterno res creauerit, sed de nouo in principio tempo-

temporis, respondent nonnulli ex Theologis, quia ipsi ita placuit, & voluntatis diuinæ causa non est quærenda, cum illi soli nota sit. Alij diuinæ propterea Deum ab æterno non procreasse Mundum, vt nobis ex hoc innotesceret, ipsum non naturaliter Mundum produxisse, sicut naturaliter à patre est filius genitus ab æterno, ab utrisque spiritus processit sanctus, sed libera eius uoluntate quando statuit illum creare Diuus Thomas cuius Doctrina, tum philosophica, tum theologica facilis, exquisita, ac omnino tutissima existit in expositione contextus 12. & 13. octauæ libri Physicorum dicit. Si quærat cur Deus voluerit Mundum non semper esse sine dubio dicendum quod propter se ipsum, sicut enim propter se ipsum res fecit, ut in eis suæ bonitatis similitudo manifestaretur, ita uoluit eas non semper esse, ut sua sufficientia manifestaret in hoc, quod omnibus alijs non existentibus ipse in se ipso omnem sufficientiam beatitudinis habuit, & uirtutis ad rerum productionem. Et hoc quidem dici potest quantum humana ratio capere potest de diuinis, saluo tamen secreto diuinæ sapientiæ, quod a nobis comprehendendi non potest. Aliud in quo Theologia, ac Philosophia discrepare uidentur pertinet ad finem uniuersi. Theologia etenim uere nobis ostendit tum authoritate diuinę scripturę tum etiam ratione humana idem confirmat omnia quæ in Mundo sunt exceptis Angelis, & Dæmonibus animabus nostris cælo & elementis, quandoque desinere esse, in die uidelicet vniuersalis Iudicij, & ope ipsius ignis: authoritate quidem ut in Epistola secunda Petri Principis Apostolorum capite tertio, cuius uerba sunt hæc Adueniet autem dies Domini, ut fur, in quo Cæli magno impetu transient elementa uero calore soluentur, terra autem, & quę in ipsa sunt opera exurentur, remanebunt uero cæli. Elementa, & homines tam boni quam mali. Idem præterea ratione fulcitur tum quia sicut igne diuini amoris omnia a Deo producta sunt, ita omnia illa, quæ beatitudinem æternam participare non poterunt,

terunt, aut diuinæ Iustitiæ, & miseriæ igne sensibili, cum sensibilia sint, perire conueniebat, posteaquàm omnibus hominibus, qui procreandi erant vsum proprium præstauerant: tum etiam, vt vniuersali iudicio in quo finalis sententia omnium terribilissima, terribilibus ardoribus, ac terribilissimo, vt ita loquar, modo destructionis coniuncta videbitur. Verum Philosophantes illi tanquam puri homines, & sine lumine gratiæ, & diuinæ doctrinæ hucusque mente, & fide non peruenerunt: Qui vero non solum philosophi, verum etiam de numero fidelium sunt, inexcusabiles sunt si illuc quo illi lumine naturæ conscendere minime possunt ipsi lumine gratia peruenire nolint recusentque.

Tertia calumnia proponitur suis rationibus corroborata. Cap. XL.

Tertius error qui Philosophiæ ascribitur similiter ad Deum ipsum Deorum, & causam causarum & bonitatem bonitatum pertinet. Huius etenim facultatis sectatores Deum hominis & humanarum rerum prouidentiam habere negant, quā sententiam non minus profecto falsam, quā impiam huiusmodi apparentibus rationibus confirmare nituntur, quarum vna est hæc. Quemadmodum rerum vi-
lium non conuenit Regi apud nos prouidentiam habere, sic nec Regi Regum. At homo, & res humanæ viles sunt respectu illius, ergo ipse habere hominis & rerum humanarum prouidentiam minime congruit. Altera sit ista. Si Deus
hominibus prouideret, ira afficeretur cum mali bonis iniuriam faciunt, vt patet, & ita eius vita cum molestia continuo esset at eius vita ab omni molestia, vtpote omnino
fœlix, longe abest. ergo Deus nostri curam nullam habet. Tertia, ac postrema huiusmodi esse videtur. Si Deus ho-
minum sollicitudinem haberet, non permetteret iniustos omni bonorum genere abundare, vt sanitate, rerum copia,

1. Ratio.

2. Ratio.

3. Ratio.

I & ho-

& honoribus, iustos autem è contra ægrotare, sperni, & pauperie premi: aut mala, & iniusta esset eius prouidentia.

Adducta calumnia exploditur & rationes illius pulcherrime diluuntur. Cap. XLI.

VT ergo philosophia ab huiusmodi falso crimine defendatur ad rationes in oppositum adductas respondendum est. *Dissolutio primæ rationis.* Ad primam itaque imprimis negandum est hominem rem vilem existere, nam præterquam quod omnium animalium, quæ apud nos sunt præstantissimum est, cum parte animæ diuina, & immortalis, scilicet intellectu, quo intelligit, & sapit præditus sit, insuper solus Deum colit. *Responsio ad secundam rationem.* Obiecto secundo sic occurrimus, omnia a Deo reguntur ita, vt ex causis determinatis debito ordine fiant, & conferuentur, & hæc homini inserviunt, quando quodlibet ex illis homini aliquem vsum præstet, ergo tanto magis Deus hominis curam habet. Quod si omnia sensibilia corpori humano deseruiunt, ita disponente Deo, quanto magis etiam animæ inservire debent, vt inde occasionem sumamus eam à vitijs purgare, & virtutibus omnibus exornare, simul ac diuina pietate; quemadmodum superius declaratum fuit. Tertio dicendum est, hominem vile quid existere, si eum cum Deo conferamus vt ens est: at si cum illo comparetur, vt est illius opus & filius, cum eo cognitionem habens animæ dubio procul. adeo vilis minime censeretur, sed nobilis, ac Deo gratus homo, quemadmodum, & proprii filij non solum nobis, sed etiam brutis chari visuntur. Ad vim argumenti negatur similitudo, quia Deus in prouidendo nobis, aut cæteris rebus non distrahitur vt Rex, à sua beata vita, & a cogitationibus grauioribus. Neque cum labore, vt Rex apud nos, res vniuersi gubernat, cum immaterialis existat, & ab omni contrarietate remotus. Ad secundam argumentationem dicatur, Deum non commoueri affectibus.

bus, vt nos; cum affectus, vt irasci timere, odire, & huiusmodi animæ, & corpori communes sint, vt primo de Anima Contextu xiiij. ab Aristotele demonstratur Deus namq; purus intellectus est, & ita non remouetur a sua beatitudine. Quod si dicatur. In diuinis litteris mentio fit iræ Dei & misericordiæ, respondent, & optime ipsi Theologi, similitudine operationum intelligi hos affectus offendi in ipso Deo, quia facit opera iræ, aut misericordiæ, & non quia proprie in eo sit tale quippiam (verbi gratia) molestia afficiatur. Ad tertium, & vltimum argumentum tripliciter responderi potest, & optime, Primo quidem, si dicatur fecerit in sanitate, diuitijs, & honoribus, & alijs huiusmodi minime consistere, sed in viuendo secundum rectam rationem & pro copia, aut paucitate huiusmodi bonorum semper illis recte utendo, ut iusti faciunt, iniusti uero contra quod male, infelices, & miseri sunt, etiam si uideantur esse felices, & cum prosperitate fortunæ. Secundo dicendum est infirmitatem, paupertatem, uilipendium, & alia huiusmodi, quæ mala communiter dicuntur ægrotantibus ægritudini animi remedia esse ut ab ea liberentur, & bona a Deo recipiant. Etenim qui sanitate animæ ualent ad uirtutum exercitium, puta fortitudinis, & magnanimitatis propensi cernuntur. Bona iustis a Deo si quandoque tribuuntur, id fit ut illis recte utantur sui, & aliorum gratia. Iniustis uerò condonantur, & prauis ad ultionem, & poenam, Nam auari toto uitæ tempore circa lucra laborantes, cum anxietate, uigilijs, ac formidine semper adiuncta nullum usum, nullamque delectationem e pecunijs capiunt, Et quænam hac fuerit poena iusta magis, & urbanior? Ommitto de industria quod multi a luxu ob diuitias interficiuntur. Hisce duobus modis Philosophia in sui defensionem nos tertio argumento respondere docet. Modum denique tertium respondendi Sancta Mater Ecclesia suorum interuentu Doctorum nobis indicat, qui talis ubique prædicatur. Deus ita

Ad tertiam rationem.

I 2 nobis

nobis prouidet, ut his qui bona receperunt in hac uita, & minime recte, & pie eis usus sit, infinitam eius bonitatem offendens sempiternis pœnis sensus, & intellectus plectantur. His uero qui huiusmodi bonis reuera caruerunt, aut saltem quo ad affectum, æternam largitur beatitudinem. Ex his igitur patet falso philosophiam incusari nempe quod ipsam Deo prouidentiam neget quando potius cum fide conueniat, ac Deum hominum curam habere diligenter, & exquisitè doceat, diligentissime uero statuitur atq; ostenditur ab ipsis Theologis.

*Calumnie pertinentes ad Angelos & demones proponuntur
suis rationibus fulsæ in quibus philosophiam
Theologiæ oppugnatricem garriunt.*

Cap. XLII.

*Prima
calum-
nia.*

CIrca Angelos etiam uidetur aberrare Philosophia, & præcipue Peripatetica; primo quidem quia solum tot numero illos esse statuit, quot Astronomia antiqui orbes adinuenerunt, quibus Aristoteles ipse nonnullos addit, ita ut omnes quinquaginta quinque tantum sint. Atqui secundum fidem multo plures sunt. Christus namque Iesus captus, ut crucifigeretur, inter ceteras rationes quibus Petro Apostolo persuadet ne pro sui defensione dimicet una est hæc, quia si resistendum esset rogaret patrem & exhiberet illi plusquam duodecim lègiones Angelorum; legio uero vna, ut Theologi dicunt sex milia sexcentos sexaginta sex Angelos continet. Secundo errant Philosophi tam Platonicæ, quam Peripateticæ, quia si materia principium est, & causa unde omnia mala procedunt, Angeli uero a materia omnes æqualiter immunes sunt & immobiles ergo apud eos Angeli peccare non possunt, & ita non videntur posse reddere vllò vnquam pacto rationem cur aliqui sint boni Angeli, aliqui mali, sicuti fides catholica secundum quam omnis creatura cum dono libertatis creata est, potest naturaliter

*Secunda
calum-
nia.*

fer ad bonum, & ad malum se vertere, vt de Angelis. Quod malum scelusque patrare queant patet, quia simul cum lucifero ceciderunt, & ex bonis, ac iustis, qui cum Deo manserunt eo foeliciter in æternum fruuntur. Tertia réprehensio sit hæc, quia Aristoteles qui Philosophorum Princeps ab Alexandro, & ab Auerroë existimatur, videtur Dæmones (qui a Theologis Angeli impuri, & mendaces dicuntur) negare, tum quia secundum ipsum animæ actus corporis simplicis elementi esse non potest, sed organici, Dæmones autem apud Platonicos animæ sunt intelligētes in medio constitutæ inter Deos, idest substantias separatas, & animas nostras cum corpore aereo; tum etiam quia Dæmonum opera admirabilia Aristoteles non in ipsos Dæmones, sed in humorem melancholicū, vt apud ipsum in libro de diuinatione per somnia videre est, tamquam in huiuscemodi operum admirabilium propriam causam reducere videtur.

*Tertia
calum-
nia.*

Lapsus calumniarum ad Angelos pertinentium præceptis ostenditur. Cap. XLIII.

VT itaque Philosophiam circa angelos, ac dæmones non ita ex professo, & de industria errare, vt illi passim imponunt; Ad ea quæ in contrarium adducta sunt respondendum est. Et ante omnia quantum ad numerum Angelorum, & Dæmonum secundum fidem & rei veritatē longe plures sunt, quam numerus corporum cælestium existat. Ex ijs præterea nouem chori componuntur qui ad tres Hierarchias reducuntur à Dionysio Areopagita, & a cæteris Theologis ita, vt quælibet Hierarchia ex tribus choris Angelorum constituatur, quæ triplex Hierarchiarum distinctio, quoniam omnia quæ fiunt in creaturis ministrantur per Angelos, quippe quorum aliqui rationes accipiunt in ipso Deo, & sunt primi tres ordines, alij rationes sumunt in causis vniuersalibus, & hi chori secundæ Hierarchiæ

*Defensio
à calum-
nia de nu-
mero An-
gelorum.*

chie sunt descendendo. Tertio alij rationem lumunt in proprijs affectibus, & hi tres vltimi Chori ad tertiam, & vltimam Hierarchiam pertinent, quemadmodum præclare dicitur, & exponitur à Diuo Thoma in Commentarijs suis in Epistolam Pauli ad Ephesios in lectione septima. Quare verò diuersis nominibus Angeli in diuersis Choris existentibus diuersis nominibus appellentur declaratur ab eodem Diuo Thoma, & ratio assignatur. hoc supposito Platoniorum principio, omne quod alicui cōuenit tripliciter conuenire potest, aut essentialiter, aut participatiue, aut causaliter, vt videri potest, & intelligi a quolibet in Cōmentarijs eiusdem Diui Thomæ in Epistola Pauli ad Colossenses in lectione quarta, Vnde etiam patet Philosophiam Platoniam ad rationem nominum Hierarchiarum, seu Angelorum cuiuslibet Chori assignandam, ac intelligendam maxime conferre. Quantum uero ad determinationem Aristotelis de numero Angelorum secundum numerum orbium cælestium dici potest, quod eius ratio de numero Angelorū mouentium orbis concludit probabiliter, non autem de numero Angelorum simpliciter, & quo ad numerum intellectuum, quas Aristoteles compræhendere nō potuit cum sensum lateant, & cum in hac uita sumus non sine sensu intelligere possumus, pro defensione Aristotelis insuper dici potest ipsum fateri se probabiliter numerum illarum substantiarum ostendisse. Id quod ea uerba palam indicant, quæ paulopost intulit in 48. contextu, dicens. Quod enim necessarium est relinquatur potentioribus dicendum, fortassis intelligens diuinos homines, aut Christum ipsum, qui suo tempore expectabatur. In hunc sensum etiam locus ille Platonis in illo libro, qui dicitur ciuilis, ubi de Regno a Marsilio Ficino, & ab Aenea Platónico exponi uidetur, ubi Plato cum locutus fuisset de primis hominibus ex terra genitis, & de illorum uita foelici sub Saturno, id est de uita contemplatiua, & paucis contenta dicit. Sed hæc omittamus donec aliquis

aliquis horum idoneus appareat nuncius, qui nobis referat
 vtrum homines illi scientijs, & confabulationibus operam
 dederint. idoneum nuncium interpretantur illi Platonem
 intellexisse de Christo, qui Magni Consilij Angelus dicitur,
 veluti missus ad Patris æterni doctrinam, & voluntatem no-
 bis deferendam, & exponendam in sui gloriam, & nostri
 salutem sempiternam. Ad secundam repræhensionem de *Defensio*
 causa malitiæ Angelorum, qui a Deo auersi sunt, dici po- *à secun-*
 test materiam esse causam omnis mali, quo ad inclinationē, *da calu-*
 vt superius determinatum fuit. At quo ad malum quod ob *nia.*
 inconsiderationem boni minoris, qui non refertur (vt ratio-
 ni consentaneum est) in summum & optimum bonum sic
 Angeli peccare potuerunt, & illi qui ceciderunt, hac ratio-
 ne peccarunt quemadmodum a Diuo Thoma determina-
 tur in prima parte summæ quæstione 43. articulo primo. So-
 lus Deus, vt qui purus est actus, etsi liber sit peccare non po-
 test. At in Angelis nonnihil potentiæ est alioquin, vt con-
 fitetur, etiam Auerroes in suis digressionibus in tertium de
 Anima in eis distinctio & multiplicatio non esset.

Calumniarum ad demones attinentium ruina maxima de-
monstratur. Cap. XLIIII.

DE tertio errore imprimis dicatur Aristotelem dæmo-
 nes minime negare, cum illorum meminerit: tum se-
 cundo de Anima, tum quinto Metaphysices in capite de
 substantia: & alibi, vt in libello nostro de spiritibus, &
 dæmonibus adnotauimus. In præsentia restat, vt obiectis
 in contrarium adductis occurramus. Ad primum dicatur
 Aristotelem negare Dæmones non absolute, sed in corpore
 simplici, & elementari, existere posse, vt anima videlicet
 in corpore naturali organico est, sed nō ob hoc negare quin
 in eodem esse possit per assistentiam, quemadmodum etiam
 intelligentiæ in orbibus cælestibus esse ab eodem statuuntur.

Ad

Ad aliud dici potest. Aristotelem non reducere omnes effectus admirabiles in humorem melancholicum, sed eos duntaxat qui naturali ordine minime procedunt, nō autē alios. Aut dicatur huiusmodi effectus ab humore pendere tamquam a causa materiali, a dæmone vero velut a causa efficiente, quod nullibi Aristoteles negavit. Non explicuit tamen aperte suam sententiam, quod supra eius prudentiam, & vires esse cognosceret dæmones esse ratiocinio probare demonstratio quemadmodum de ijs qui secus Herculeas columnas, & qui in Boristeni prævidere futura confitetur. Ex quo loco etiam patet Aristotelem rerum omnium scientiam minime sibi vendicare, sed aperte dicere eorum causas supra captum sui ingenij, & humanæ sapientiæ existere, cum alioquin eiusdem intellectus omnium veritatū capax existit. Ergo ad sapientiores recurrendum, cuiusmodi Theologi nostri sunt qui ex diuinis litteris, quæ de Angelis ac dæmonibus statuenda, ac credenda sunt optime didicerunt.

*Calumnia de anima nostra proponitur eademque rationibus
& authoritatibus confirmatur. Cap. XLV.*

Cōfirmatur calumnia authoritatibus primæ authoritatis.

NVnc tria supersunt excutienda, scilicet in quibus Philosophia potius nonnullorum culpa peripateticorum, quam sui ipsius taxatur, ac repræhenditur, quorum primum est istud, quod ipsa cum his suis sectatoribus videtur contra fidem, & bonos mores determinare animam nostrā quo ad omnes eius potestates (excepto intellectu agente, qui apud illos est Deus) de potentia materiæ educi, & ita incipere, ac desinere esse: quam opinionem tum falsam, tum impiam authoritatibus, & rationibus tueri conantur: Vna auctoritas in tertio de anima habetur in contextu 162. secundum diuisionem Græcorum ubi dicitur bruta imaginationibus regi quo ad illorum operationes, quia intellectu carent, homines etiam multos quia in his intellectus obruitur

tur aliquando perturbatione; vt patet in ira affectis, aut
vehementi amore, aut ægritudine, quemadmodum in deli-
rantibus ob ardentissimam febrem, aut etiam somno. Ec-
ce igitur quod intellectus operatione corporis læditur, atq;
ita corporeus, & mortalis existit secundum Aristotelis opi-
nionem. Alia autoritas in tertio de anima continetur in <sup>2. Autho-
ritas.</sup>
contextu 20. secundum Auerrois diuisionem, vbi de intel-
lectu agente verba faciens per comparisonem ad intellectū
potestatis. de agente Hæc verba diligenter perpendenda
ab his, qui eius mentem compræhendere volūt, Philosophus
protulit. Separatus autem est solum hoc, quod quidem est,
& hoc solum immortale est & perpetuum. Deinde profe-
quitur de eodem intellectu agente, & de passiuo inquiring.
Non reminiscimur autē, quod hoc quidem impassibile est;
passiuus vero intellectus corruptibilis est, & sine hoc nihil
intelligit. Ecce dicunt Alexandrei, quod Aristoteles solum
agentem dicit esse immortalem, & reddit rationem, quare
passibilis corrumpatur, quia non intelligit sine memoria, &
sensibus internis, quæ potentia corruptibiles sunt. Quam-
obrem ne ipse restet ociosus, hoc est absque operatione; di-
cendum erit etiam ipsum incipere, & desinere esse. Tertia, <sup>3. Autho-
ritas.</sup>
& postrema autoritas ex ijs, quæ maximi momenti esse
videntur pro animæ nostræ mortalitate, est in libello de lon-
gitudine, & breuitate vitæ, vbi imprimis distinctionem quan-
dam de modis corruptionis rerum proponit, quæ sic habet.
Res corruptibiles, aut proprie & per se corrumpuntur, vt
ignorantia scientia adueniente: Scientia namque per obli-
uionem, aut per accidens ad corruptionem subiecti destrui-
tur, quandoquidem corruptis animalibus corrumpuntur &
scientia, & sanitas, quæ in ipsis erant. Secundo statim hæc
infert verba. Qua propter, & de anima ratiocinabitur quis
vtique ex his. Si enim est non natura, sed quemadmodum
scientia in anima, sic anima in corpore, erit vtique ipsius,
& alia corruptio præter corruptionem, qua corrumpitur

K cor-

Calunia
cōfirma-
tur ratio
nibus pri-
ma ratio

corrupto corpore . Ecce dicunt Alexandrei , ex isto loco patet, Aristotelem velle, animam corrumpi, siue per se, siue per accidens . Quò ad rationes , prima ita formatur . Si intelligere est phantasia, idest phantasiari; aut non sine phantasia, non contingit sine corpore esse ; vt primo de anima contextu xij. ab Aristotele dicitur. Sed intelligere non est sine phantasia , sicuti tertio de Anima declaratur . Ergo intelligere siue corpore minime est, & ex consequenti neque ipse intellectus intelligens. Ergo corpore corrupto, pariter ille corrumpitur . Secunda horum philosophantium ratio sit hæc. Nul- lum æternum est pars compositi corruptibilis: quia æternum æterno debet coherere: nam impossibile est aliter fieri, primo cæli contextu xxij. Sed anima nostra est pars nostri , qui corruptibiles sumus, quemadmodum & generabiles fuimus.

2. Ratio.

3. Ratio.

ergo anima nostra non est æterna . Tertia argumentatio est Alexandri in sua paraphrasi de anima, quæ ita componitur. Nulla forma separari potest ab eo, cuius est forma. sed anima nostra quo ad omnes eius facultates est forma huius corporis naturalis organici . ergo anima nostra penitus a corpore isto inseparabilis est . & ita eo corrupto, etiam ipsa esse definit .

Falsitas calumnie patet, & animam nostram immortalem esse demonstratur. Cap. XLVI.

Animæ
immorta-
litatis de-
monstra-
tur pri-
ma ratio

Oppositam sententiam supra statuimus cum Aristotele, Platone, Theophrasto , ac cæteris Græcis, excepto dumtaxat Alexandro ; quam fortissimis muniuimus argumentationibus, nempe quibus addimus modo hanc . Aut anima nostra respectu Dei consideratur, aut ad cæteras animas inferiorum viuentium refertur ; aut ad se ipsam comparando partem intelligentem cum inferioribus, quæ minime intelligunt . At ea quomodocunque consideretur , immortalis , ac diuina exiit, & remanet corrupto corpore . & ita opinio opposita penitus falsa , tum etiam impia depræhendi-

henditur . Primum id ex parte Dei liquet : quia si anima fo- *Ex parte*
 ret mortalis, boni a Deo minime remunerabuntur, neque *Dei im-*
 mali pœna afficerentur. Sed hæc diuinæ prouidentiae, & iu- *mortali-*
 stitiæ repugnant, & absurda sunt. ergo iniustum, & absur- *tas ani-*
 dum est arbitrari animam nostram esse mortalem, quin imò *me pro-*
 pium, ac iustum est credere sententiam oppositam, hoc est, *batur.*
 eam esse immortalem. Hæc ratio est Ammonij in Commen- *1. Ratio.*
 tarijs suis in caput de Relatiuis. Ratiocinium aliud a Nilo *2. Ratiq.*
 in suo libello de Ratiocinationibus ita formatur. Si Deus
 est bonus, bene facere debet ijs, qui in hac vita recte se gesse-
 runt. Quod si id agat, quod æquitas postulat, dubio pro-
 cul anima nostra immortalis est, Atqui Deus est bonus, bo-
 na igitur ijs elargitur, qui in hac vita recte operati sunt.
 Vnde sequitur, animam nostram corrupto corpore, rema-
 nere. Ex parte vero aliarum animarum aliorum viuentium *Ex parte*
 inferiorum idem probatur : quia si anima nostra, quemad- *animarū*
 modum, & anima illorum materialis, & corruptibilis exi- *inferiorū*
 steret; præterquam quod homo, qui præstantissimus omniū *animan-*
 horum est viuentium, infelicior cæteris existeret ob tot gene- *tium ani-*
 ra malorum, quibus quotidie angetur; etiam eius anima di- *nam no-*
 uino cultui dedita minime dignosceretur, quemadmodum *strā im-*
 nec animæ aliorum viuentium : nec honore inflammaretur *mortalē*
 ad bene agendum, sicuti nec aliæ accenduntur. At hæc fal- *esse osten-*
 sa sunt, ergo falsum est, animam nostram eiusdem conditio- *diur.*
 nis, & generis esse mortalium; cuiusmodi visuntur animæ
 cæterorum viuentium. Postremo si in nobis inter se partes *Etiā si cō-*
 animæ materiales, & immateriales conferantur, idem de- *paretur*
 monstrabitur hoc pacto. Si pars rationalis, & intelligens *aīa no-*
 materialis, & corruptibilis foret, ea curaret solummodo bo- *stra intel-*
 num corporis. Verum pars rationalis, & intelligens bonū *ligens cū*
 corporis primo minime curat, sed proprium, quod in virtuti- *cæteris in-*
 bus, & scientijs consistit; & repugnat inferioribus a delecta- *feriori-*
 tione sensus vltro se ipsam retrahens propter delectationes *bus, im-*
 proprias & sinceras. ergo proprium esse sine corpore habet, *mortali-*
tas tamē
eius ap-
paret.

& ita immortalis existit. Firmissime igitur cum philosophis & cum fide animæ nostræ immortalitas sustinenda venit, qua simul diuina iustitia, ac bonitas defenditur; nec non hominis præstantia super omnibus viuentibus inferioribus homini deferuentibus. Ad hæc ita noster intellectus supra cæteras eius potestates eminet.

Rationes detractorum dissoluuntur, & authoritates illorum explanantur. Cap. XLVII.

Ad primam authoritatē Cæterum ad ea, quæ in contrarium adducta sunt ab Alexandreis, facile est respondere. Ad primam authoritatem, cum dicebatur. Intellectio læditur a materia, sicut ob ægritudinem: ergo materialis est, dico id verum esse, si per se, ut operatio communis animæ, & corporis læderetur. Atqui læditur per accidens ad læsionem sensus alicuius, aut spiritus sensui deferuentis, teste eodem Aristotele primo de Anima contextu lxvi. ipsum autem intelligere impassibile est: *Ad secundam authoritatē* Ad secundam authoritatem textu xx. tertij de Anima dicendum est imprimis, quod illa particula exclusiua solus, non excludit intellectum potestatis; quoniam Aristoteles ita sibi ipsi repugnaret: tum quia in contextu vij. probauerat intellectum possibilem organicum non esse & ita separabilem: tum quia ex huius separabilitate, arguendo a minori ad maius, concludit etiam agentem separabilem esse in contextu xix: quia si ille, ergo tanto magis iste, cum ille sit patiens, & hic agens, & agens præstantius patiente existat. Excludit ergo sensum cum cæteris inferioribus, & organicis facultatibus. Secundo dico Aristotelem in contextu xx. per passiuum intellectum non intelligere intellectum potestatis: tum quia iam supra probauerat, eum esse non organicum, & secundo de generatione animalium extrinsecus accedere, & esse immortalem: tum etiam quia passiuus intellectus, sine quo nihil intelligit, est intellectus potestatis, non autem intellectus agens, alioquin etiam iste alio intellectu

intellectu agente indigeret. Itaque per passium intellectum,
 opus est cum reliquis Græcis, & cum Diuo Thoma expo-
 nere phantasiā, quæ ob aliquas similitudines cum intelle-
 ctu, pariter intellectus ab antiquis dicebatur, & ab Aristote-
 le passius intellectus nominatur hoc in loco. Ad tertiam, *Ad ter-
tia aucto-
ritatem.*
 & vltimam auctoritatem dicatur. Aristotelem loqui de ani-
 ma quo ad sensum, in quo scientia eadem est, sed rerum in
 particulari; non autem quo ad intellectum, vbi scientia alio
 modo est, in vniuersali videlicet, alioquin sibi ipsi, & veri-
 tati, & rationi repugnaret. Ad primam argumentationem *Ad pri-
mam ra-
tionem.*
 dico imprimis quo ad intellectionem phantasmatum intelli-
 gere, non tamen sine corpore, cum imaginari pertineat ad
 imaginatricem facultatem, quæ virtus in corpore existit.
 At quo ad intellectionem omnino Propriam, qua diuina
 quandoque intelligere valet, aut cum corpore, aut sine cor-
 pore existens. sic remanet sine corpore. Secundo dico qua-
 tenus ex hoc, quod intellectus per accidens intelligit cum
 virtute sensitiua, quæ virtus in corpore est, Aristotelem col-
 ligere intellectum per se extrinsecus accedere, & esse immor-
 talem secundo de generatione animalium capite tertio: quia
 si per accidens, id est per aliud, nempe per sensus intelligit,
 non sine corpore. & per accidens præsupponit id, quod per
 se est. Ergo intellectus sua natura sine corpore intelligit &
 sine corpore esse potest. Ita nimirum secundo Phisicorum
 contextu lxvi. arguit. Si cælestia a fortuna; & a casu sunt,
 quæ causæ per accidens existunt; & causæ per accidens cau-
 sis per se posteriores sunt. ergo prius a natura, vel ab intel-
 lectu reguntur & sunt. quæ causæ per se dicuntur. Similiter
 in libris de Cælo ex hoc, quod elementa motu præter naturā
 ad loca opposita mouentur, vt grauiā sursum, cū proijciun-
 tur, & leuiā deorsum. Quæ vero præter naturam, ea quæ
 secundum naturam sunt, præsupponunt. concludit per se
 grauiā prius motu naturali deorsum moueri, & leuiā sur-
 sum. Per se igitur ex intellectione, quæ per phantasmata fit
 intel-

intellectum non sine corpore esse concludit; ex accedente autem, & connotato, ut operationem omnino propriam connotat, sic intellectum a corpore esse separabilem, inferri potest. Ad secundum argumentum dupliciter responderi potest. Primò quidem reflectendo ipsum hoc pacto. Nullum æternum pars compositi corruptibilis est, sed materia prima ex Aristotelis sententia primo Physicorum contextu 82. æterna est, ergo materia prima ex Aristotelis sententia non erit pars compositi corruptibilis. quod eius doctrinæ aduersatur in contextu 64. & 65. Soluant igitur Alexandrei hoc argumentum, & nos illorum ratiocinia pariter dissoluemus. Secundo uerò dicimus, immortale immortali esse coniungendum; sicut corruptibile corruptibili, quando composita sunt extrema; aut scilicet penitus æterna, ut orbes cum intelligentijs, aut penitus corruptibilia, ut hæc inferiora omnia, excepto homine; qui cum compositum medium per participationem extremorum esse debuisset; ut omne genus entis in mundo esset; & ut à Deo esse & uiuere omnibus tribueretur, & non solum penitus æternis, & penitus corruptibilibus. Verum etiā composito partim corruptibili, & partim æterno; corruptibili quidē quantum ad corpus; æterno autē quoad animam. Postremo ad argumentū Alexandri duo dicenda sunt, quorum primū sit istud, scilicet Aristotelē in contextu xi. Secundo de anima nos edocere, quid ex illa prima animæ definitione colligatur, & quid ei non repugnet, & tertio quod nondum ex illa pateat, colligi quidem animam non separari a corpore; aut partes quasdam ipsius, si anima partibilis natura est. Nihil prohibere vero secundum quosdam eam a corpore separari: propterea quod nullius corporis agnoscatur actus. De tertio dicit. Amplius autem in manifestum, si sit corporis actus anima, sicut nauta nauis. Aristoteles igitur notat, ex illa definitione non esse concludendum de anima quo ad omnes eius partes ipsam a corpore inseparabilem esse: secundum, quod dicendum est pro argumentum.

Ad secundam rationem.

1. Responsio.

2. Responsio.

mentationis Alexandri dissolutione, sit istud. formam esse in duplici differentia; aliam quidem, quæ penitus de potentia materiæ educitur, sicuti forma elementi, lapidis, Plantæ, & bruti. Hæ omnes materiales sunt, & partibiles, idq; partitione materiæ, cum a materia non separentur sine illarum destructione. Aliam vero, quæ separabilis est; ut intellectus noster possibilis, ut loco sæpius citato secundo de Generatione animalium, demonstratione sumpta a propria & separata operatione concludebatur. Nec potest dici eo in loco Aristotelem intelligere de intellectu agente: propterea quod loquatur ibi de partibus animæ, non autem de intellectu agente; qui apud Alexandreos est ipsa prima causa. Additur, quod fuisset diminutus, nullam intellectus potestatis mentionem faciens. Anima itaque nostra intellectiua, si consideretur quo ad eius operationes omnes, nempe quatenus nonnumquam organicæ sunt, mediate, vel immediate, tum inseparabilis videtur à corpore. Sin autem quo ad operationem omnino propriam & intellectui per se competentem; hoc pacto superest, corrupto quantumvis corpore. Exempli gratia proponatur hæc similitudo. Nauta si consideretur quo ad operationes ei communes cum Naui, dubio procul eas absq; nauì peragere non potest; quo autem ad propria eiusdem opera. secundum hunc considerandi modum, nauta cum existere, vel seclusa nauì, tum operari potest? Sed dicet aliquis. Quælibet intelligentia duas habet operationes, alteram tum orbi suo communem, scilicet, ut illum in circulum moueat, alteram vero propriam, scilicet intelligere: cum alioqui semper orbi coniuncta sit. Ergo tanto magis anima nostra cum corpore nostro perpetuo manebit. Quin etiam eæ orbium intelligentiæ fortassis anima nostra fuerint infœliciores: quandoquidem ab orbe numquam liberentur; a corpore vero nostram animam aliquando immunem esse contingat. Ad obiectionem huiusmodi dicendum est, nullius eam esse roboris. Primo quia quælibet intel-

r. Calum
nia.

telligentia simul cum suo orbe de numero vniuersalium causarum est, & ita si hæc mediante motu sui orbis, & luminis operari debet, impossibile est eam ab orbe separari. Verum animæ nostræ tamquam singulares, & numero differentes sub eadem specie ad vniuersi conseruationem, velut vniuersales causæ & per se, nequaquam faciunt per accidens ad conseruationem speciei, cum particularis vnus homo gignat alterum, & ita qui genuit non est amplius ad conseruationem speciei necessarius: quia supersunt alij homines intelligentes cum corpore; etiam si priores sine corpore alia vita intellectiua viuant. Secundo quia non ob hoc intelligentia infœlicior, aut minus fœlix est anima nostra, quod illa in mouendo suum orbem non distrahant a sua propria operatione vbi ab intellectu beatifica, sicut euenit intellectiuo nostro, qui a corpore, & a sensu impeditur.

Due calumnie ad animam nostram pertinentes proponuntur & suis rationibus confirmantur.

Cap. XLVIII.

Reliqua duo ad animam nostram eodem pacto pertinentia sunt hæc, quia secundum fidem beatitudo nostra censetur vnica, quæ nimirum in intellectu simul, & amore Dei, eiusq; fruitione consistit; quippe quam non in hac, sed in altera vita mediante diuina gratia consequi valeamus. Atqui secundum Philosophos fœlicitas nostra duplex est, quarum altera actiua dicitur: propterea quod in recta actione consistere videatur, quemadmodum ab Aristotele primo de moribus ad Nichomacum demonstratum est: quæ quidem actio recta virtute duce fit, vt ibidem ab Aristotele statuitur. Virtute etenim rectè vtimur diuitijs, sanitate, & cæteris bonis. Huiusmodi porrò fœlicitas consistere dicitur in cognitione rerum, atq; bonis fortunæ; quemadmodum Plato in Mennone, vel de virtute sub persona Socra-

Socratis nos edocet. Alterum genus nostræ felicitàtis in Dei cognitione cum admirabilibus voluptatibus coniuncta ab Aristotele quidem in x. de Moribus, a Platone vero in Philebo, & in Timæo, & in Phædone reponitur. Tertio secundum doctrinam diuinitus reuelatam videre Deum de^{2. Calu-} facie ad faciem, & ita esse vere foelices, & beatos, & credimus, & scimus, non in hac, sed in alia uita. Verum apud Philosophos id nobis tum in hac, tum in alia uita contingere potest. Plato etenim ut in pluribus negat homines in hac uita foelicitatem consequi posse ob multa incommoda, &^{1. Autho-} impedimenta, quæ perpetuo nobis accidere videmus. Concedit nihilominus admodum paucos hic foelices posse euadere, cuius verbain Dialogo illo qui dicitur Epinomis, vel philosophus in initio fere sic habent. A THEN. Scite loqueris, ò amice Clinia. Sermonem vero quemdam nunc mirum; & rursus quodammodo non mirum auditurum te reputo. Multi enim fluctibus huius vitæ iactati illud prædicant, humanum genus foelix, ac beatum esse non posse. Attende igitur, & considera vtrum, & ipse recte hac de re dicere videar. Impossibile arbitror hominem in hac vita præter admodum paucos foelicitatem, & beatitudinem assequi. Mercurius ter maximus in principio sui Pimandri de se ipso inquit,^{2. Autho-} quod cum de rerum natura cogitaret consopitis sensibus intellectu diuinam mentem vidit, & ab ea tum Mundi constitutionem admirabilem didicit, tum quo pacto homines recte pieq; instituerunt, & ita confiteri videtur, se in hac vita Deum per essentiam vidisse, & (vt dicunt nostri Theologi) visione intuitiua sic vt inter Deum, qui intellectu videtur & intellectum videntem nulla species intercesserit. Hoc idem de Platone refert Aristoteles in sua mystica philosophia secundum Aegyptios libro primo cap. 4. & in xij.^{3. Autho-} Metaphysices, huiusmodi philosophorum vitam beatam cum illa Dei comparans, inquit: quemadmodum nos aliquando & imperfecte intelligimus, ita Deus semper, & perfectissime

L

1. *Ratio
Platoni-
ca.*

fectissime. Ratio Platonica, qua idem persuaderi potest huiusmodi est. quia si Deum ipsum ita perfecte cognoscere, nobis ad eum pie, & ardentem colendum, & expetendum confert, & ad rectius viuendum, profecto in hac vita aliquis Deum ita perfecte cognoscere valet: alioquin Deus, aut id ignorasset, aut optimam nostri prouidentiam non haberet. At si Deus perfectissime ab aliquo intelligatur, summopere eum diligit, & ut illo placeat, optime viuet conformiter eius sapientiæ vij. de Republica. concedendum igitur esse videtur, aliquos in hac vita foelices foelicitate speculatiua esse posse. Ratio Peripatetica idem etiam conuincere videtur, nam, aut intellectus noster sub ea ratione, qua intellectus est, consideratur, aut, ut simul cum sensu in intelligendo procedit. Si ut intellectus est, cum diuinus, & immortalis existat, ei diuina secundum naturam intelligere semper conuenit. si vero quatenus cum sensu speculatur; etiam sic diuina contemplari perfectissime ualet: tum quia si minus intelligibilia, ut materialia, ope intellectus agentis intelligit, inde sequitur, quod ope eiusdem tanto magis ea, quæ sua natura intelligibilia sunt: tum etiam quia cognitio, quæ phantasmatum obitur opera, uel disponit nos ad cognitionem Dei, uel pro hac præsentis; Non pro altera uita, quia intellectus separatus non amplius a corpore, vel a sensu dependet. ergo pro hac uita: alioquin frustra esset huiusmodi per speciem contemplatio.

Philosophia ab utraque calumnia doctissime defenditur. Cap. XLIX.

*Defensio
à prima
calumnia.*

PRo philosophia in his etiam defendenda, respondeo, & in primis quantum ad Duplicem beatitudinem, dico apud illos, summum bonum simpliciter, quod propter se tantum expetibile est, unum tantum esse, & istud in Dei cognitione, ut dictum est, consistere. quod si etiam uitam secundum uirtutes morales foelicè dicunt, id ea ratione præcipua

cipua adfirmant, quia ad speculatiuam nos disponit, & possumus, merito actiuæ uitæ (concurrente diuina tamen gratia) spe, & potestate foelices dici. De altera calumnia dicendum est, aut quod Plato, Plotinus, Aristoteles, & alij multi decepti sunt similitudine accidentium communium intellectiōni diuinorum per ea, quæ per speciem intelliguntur, & eidem intellectiōni diuinorum sine ope specierum. Vtraque etenim intellectiō, cum circa maximum, ac optimum intelligibile sit, admirabilibus voluptatibus coniuncta est. Sensibilium consideratio, si non omnino, magna saltem ex parte deficit. Aut dicatur, quod cum interdum Deum, atque Intelligentias quo ad attributa transcendentia, & miro ordine, contemplarentur, & ita proximius ad intellectiōnem Dei per essentiam accederent, placuit Philosophantibus asserere proprio iudicio, quod ipsi ad intellectiōnem omnino separatam deuenerint, non quod id vere crederent, utpote scientes naturalem esse intellectus, & sensus (quamdiu degit in corpore mens nostra) colligantiam, & ita solum per species intelligere nos posse; sed ut conformarentur illi sententiæ vulgatæ, qua consueuimus efferre, de proxime accingendus, habetur pro accincto. Quod namq. parum abest, id perinde, ac si vere existeret, existimari videtur: quod illud exiguum, quod deficit, nō animaduertatur. Qui enim proxime accessit, ut aliquod magnum bonum præter intentionem obtineat, etiam si illud minime obtinuerit, nihilominus fortunatus dicitur. quemadmodum dictum est a Philosopho in secundo Physicorum Contextu 56. ubi de speciebus fortunæ verba facit. Propterea vero communi vsui loquendi se ipsos accommodarunt, ut alios ad philosophiam addiscendam, atq; æstimandam magis inflammarent. Interea venit hic perpendendum apud summos philosophantes præstantissimam diuinorum intellectiōnem, quæ illis aliquando contingebat, proxime accessisse ad intellectiōnem per essentiā; comparatione facta ad præcedentes intellectiō-

*Defensio
à secunda
calumnia.*

L 2 nes,

nes, & ad intellectiones vulgarium animarum. non autem si comparetur cum ipsa intellectu beatifica, qua cum intelligentiæ, tum beati Deum intelligunt. Quemadmodum enim philosophus, vni rationi semper inhærens, circa diuinorum entitatem non facile cognosci potest: quia vulgariū animarum oculi diuinitatis radios sustinere non possunt, vt præclare dictum est a Platone in Sophista; ita nimirum philosophus, quamquam longe superat intelligentia imperitos & addiscentes, circa Diuina tamen clarissime intelligenda se habet ad lumen solis, vt Noctua. quemadmodum summo iudicio ab Aristotele secundo Methaphysices determinatum fuit. Ad rationes in contrarium adductas respondendum est, & in primis ad eam, quæ Platoniorum est, ac dicendum, satis esse homini in hac uita, ut Deum colat, & conformiter secundum leges naturæ uiuat; si ex cognitione uisibilium ad inuisibilium intelligentiam per species, ut hic sibi naturaliter congruit, ascendere ualeat. Quamobrem inexcusabiles omnino sunt Gentiles, si Deum (ut par erat) minime coluerunt, quemadmodum ex superius dictis liquido patet. Et quemadmodum ita uere sicut, & pie nos docet Paulus Apostolus in Epistola ad Romanos cap. primo: si homo in præsentī statu uitæ Deū de facie ad faciem uidere posset, talis intellectio supra naturæ ordinem illi competeret. Deinde quo ad primam Peripateticorum argumentationem dico, intellectum iunctum sensui facilius intelligere intellectu phantasmataria, & per species intelligibiles ex phantasmatibus ab intellectu agente deductas. & negatur ipsum sub hac ratione facilius intelligere posse diuina sine ope specierum. Quo ad secundam dici potest, intellectiōem uisibilium aliquo modo conferre ad intellectiōem eorundem futuram, & aliquo modo non, conferre quidem, quatenus ex illa sequitur, nos posse, Deo illo modo cognito, eum pie colere; & imitari, & ita mereri deinceps pro futura gloria consequenda, scilicet in qua post mortem iugiter Deo fruamur,

mur, ac eum intuebimur. Illa itaq; intellectio minime superuacanea putetur. Cæterum modo non est necessaria, quandoquidem in alio statu, tali nequaquam indigeamus intellectu.

Supradicta colliguntur & detractores ad Philosophiam benigne reuocantur. Cap. L.

PRincipem igitur offendi causam, a qua Philosophia ortum ducit; quid item ipsa sit; præterea, quæ, & quot eius partes existant; necnon cuiuslibet partis utilitates; & tandem a grauioribus calumnijs defensiones; hucusq; eademet Philosophia ijs, quibus tum vere, tum pie philosophari consilium est, demonstraui. Hæc eadem, quæ omnium humanarum facultatum præclarissima est, suauissimo oris sui osculo in præsentiarum hos eosdem tum veros, tum pios philosophantes deosculabitur: si alios, qui ab ea longe recesserunt, & qui seipsos infœliciter perdunt, ad eandem suscipiendam, veræ simul, ac piæ defensionis causa, reuocent. Postmodum vero si id efficient, aut saltem vt id efficiant pro dignitate curauerint, Deus ipse illorum æterna erit beatitudo. Cum itaq; vos, qui vere sapitis in eos, qui in sinistrum iter ob ignorantiam, aut arrogantiam vna depulsi sunt, incideritis, eos ab animi turpitudine simul, ac impietate, pro virile vestra reuocetis, Exclamate, si fortassis alia uia non proficitis hunc in modum. O uiri admirabiles, qui inter primos Philosophos studiose adnumerari contenditis, quæ locum uobis in Republica Christi; corpore mystico, quod est Ecclesia Catholica, cuius caput uisibile uertexq. successor est Apostoli Petri Romanus Pontifex: quem inquam locum uobis in Republica Christiana statuitis? Nonne Deus huc uos misit, ut uosmetipsos, atque alios omni uirtutum genere, ac diuina pietate formaretis? Nonne uos philosophicè tamen excellenti clamido decorauit, ut aliquando Doctrinæ diuinitus reuelatæ ministri sitis? Reuertimini Fratres,

tres, reuertimini ad uiam, quæ ad salutem ducit, eam relinquentes, cuius finis æterna est miseria. Vos animarum Medicos (quântum humana hac uestra facultate fieri potest) constituit Deus. Curate igitur, curate uosmetipsos, atque alios; deinceps a morbis animi longe grauioribus ac morbi corporis existant: alioqui tamquam incurabiles, ac deplorati solis prædictionibus derelinquemini. Quamobrem Ecclesiæ Catholicæ summus ac optimus Pastor, ubi uos (quod optimus Deus auertat) in reprobum sensum coniectos repererit, ne alias oues uestris tum contagiosis, tum exitialibus morbis inficiatis, uel inuitus ex hoc Mundo, Deus uerò, quod multo formidabilius est, de libro uitæ delebit.

F I N I S.



R O M A E,

Excudebat Iacobus Ruffinellus. 1586.

re-
um
eft)
que
nor-
plo-
Ec-
os

KONSERVIERT DURCH
ÖSTERREICHISCHE FLORENZHILFE
WIEN 1967

005644041 31.01